

পৰ্ণপুট

BANGLADARSHAN.COM
কালিদাস রায়

বঙ্গবাণী

দ্যুলোক ভুলোক পুলকি' আলোকে জননী আমার রাজে,
অযুত-ভক্ত-অমল-রক্ত মরম-কমল মাঝে।

মঞ্জুরে ফুল চরণে, ভৃঙ্গ গুঞ্জরে মধুবাণী,
আমার বঙ্গবাণী সে যে গো অখিল জ্ঞানের রাণী।

চণ্ডীদাস যে মণ্ডিল শির হীরক-কিরীট-ভারে,
জ্ঞান, গোবিন্দ বৃন্দাবনের সুন্দর ফুলহারে;
লোচন সেচিল পাদ্য গোরার লোচন-সলিল আনি,
আমার বঙ্গবাণী সে যে গো অখিল জ্ঞানের রাণী।

দ্বৈপায়নের ভৃঙ্গার-জলে অভিষেক করে কাশী,
কবিরাজ আনে ভক্ত হিয়ার ধূপ-ধূনা-ধূম-রাশি।
কৃতি জ্বালিল বর্তি তমসা তীর্থের হবিঃ দানি,

আমার বঙ্গবাণী সে যে গো অখিল জ্ঞানের রাণী।

কবিকঙ্কণ দিল কঙ্কণ, কনে চণ্ডীর গানে,
কবিরঞ্জন রঞ্জিল পদ হৃদয়-রক্ত-দানে;
রায়গুণাকর-আরতি-আলোকে উজলে অঙ্গখানি,
আমার বঙ্গবাণী সে যে গো অখিল জ্ঞানের রাণী।

'প্রভাকর' প্রভাকরে দিল টিপ ললাটে প্রকটি জাগে,
রঙ্গ ভূষিল ক্ষত্রতেজের অরুণ অঙ্গরাগে;
দাশরথি দিল নবনী আনিয়া পল্লী-পরাণ ছানি,
আমার বঙ্গবাণী সে যে গো অখিল জ্ঞানের রাণী।

বিদ্যাসাগর রচিল হৃদয় নৈবেদ্যের খালা,
দীনবন্ধু যে গৃহ-প্রাঙ্গণে ধরিল গন্ধালা,
পুরোহিত শুচি যার পূতরুচি ভূদেব বিগতগ্গানি,
আমার বঙ্গবাণী সে যে গো অখিল জ্ঞানের রাণী।

বঙ্কিম তার অঙ্কিল চারু কাজল উজল আঁখে,
নবীন ঘোষিল জয়বাণী যার পাপ্ফজন্য শাঁখে;

হেমের হৈম হৃদয়বীণাটি শোভিল শুভ্রপাণি,
আমার বঙ্গবাণী সে যে গো অখিল জ্ঞানের রাণী।

মরালের মত মধু গান-রত চরণ বেড়িয়া ভাসে,
গিরিশ হরিষে হরিচন্দন বরিষে নূপুর পাশে।
নিখিলের শিব কবি রবি যার চরণে লুটাল আনি;
আমার বঙ্গবাণী সে যে গো অখিল জ্ঞানের রাণী।

হাসি কান্নার হীরা পান্নার দুল দিল দ্বিজ-রাজ,
রজনী করেছে রজনীতে সেবা প্রভাতে প্রভাত আজ;
দেব নর ঋষি মিলিয়াছে আসি পুষ্পাঞ্জলি-পাণি;
আমার বঙ্গবাণী সে যে গো অখিল জ্ঞানের রাণী।

BANGLADARSHAN.COM

বিশ্ব ও বিশ্বনাথ

তুমি ত জড়বিশ্ব নহ—তুমি যে নিজে বিশ্বনাথ,
পাগল ভোলা! একি এ খেলা, দৃশ্য হেরি দিবস রাত!
জ্যোছনাজ্যোতিঃ তারার ভাতি বিভূতি উড়ে তোমার গায়,
ভাঙ্গের ঘোর করেছে ভোর চরণ তব টলিয়া যায়।
বারিধি ‘পরে নদীলহরে ডমরু তুলে গভীর তান,
দোদুল-জটা জলদ-ঘটা দামিনী-দামে দীপ্যমান।
ইন্দ্রচাপে সন্ধ্যারাগে কটিতে বাঁধা বাঘের ছাল,
ধরেছ তাপ দুঃখ পাপ, গরল গলে হে মহাকাল।
তোমার পাশে গৌরী হাসে বিতরি সবে অন্নজল,
শস্যশিরে আঁচল উড়ে চরণে ফুটে কমলদল।
তুমি ত জড়বিশ্ব নহ—তুমি যে নিজে বিশ্বনাথ,
পাগল ভোলা! একি এ খেলা দৃশ্য হেরি দিবস রাত!

শিশির-কণা মাণিকজ্বলা তুলিয়া ফণা চিকণ শির,
বিটপীলতা অহির মত জড়ায়ে দেহে রয়েছে ধীর।
পিণাক তব অশনি-রবে কাঁপায়ে তুলে ভুবন তিন,
কানন ভেদি বাজিছে শিঙ্গা ঝঞ্জনিলে রজনী দিন।
ফিরিছ গলে হাড়ের মালা করোটি করে শ্মশানমাঝ,
শৃঙ্গে মেঘপঙ্ক মাখা বৃষভ তব ভূধররাজ।
তৃতীয় আঁখি ললাটে থাকি দীপ্ত ভানু কৃশানুময়,
পঞ্চশরে ঋতু পতির করিয়া তুলে ভস্মচয়।
তুমি ত জড়বিশ্ব নহ—তুমি যে নিজে বিশ্বনাথ,
পাগল ভোলা! একি এ খেলা, দৃশ্য হেরি দিবস রাত!

BANGLADARSHAN.COM

দুৰ্বাসা

কোথা যাজ্ঞিক আজি আনমনে ভুলেছ নিত্য যাগ?
কোথা ঋত্বিক করনি সাধন আপন কৰ্মভাগ?
কোথায় শিষ্য ভুলিয়াছ পাঠ গৃহের বারতা স্মরি?
দুৰ্বাসা আসে অবহিত হও, উঠ জাগো তুরা করি।

কোথা ঋষিবালা পুষিছ হৃদয়ে তাপস-বিরোধী ভাব?
অতিথি আসিয়া ফিরিয়া গিয়াছে হয়নি সংজ্ঞালাভ?
তরলতাগুলি পায়নি সলিল, হরিণী শম্পদল,-
দুৰ্বাসা আসে ভাঙো ভাঙো ধ্যান আনগে পাদ্য জল।

কোথা নরপতি ব্যসনাসক্ত অন্তঃপুরমাঝে,
লালসা বিলাসে যাপিছ জীবন হেলা করি রাজকাজে?
কোথার যোদ্ধা ভুলেছ সমর প্রেমিকার কর ধরি?

দুৰ্বাসা আসে ভাঙো ভাঙো মোহ জাগে জাগো তুরা করি।
দেব-দ্বিজপূজা, অতিথির সেবা, পিতা দেব ঋষি ঋণ
ভুলি, কোথা গৃহী ভোগ বিলাসেতে কাটাতেছ নিশিদিন?
গৃহকাজ কোথা ভুলেছ রমণী বিরহের বেদনায়?
দুৰ্বাসা আসে জাগো জাগো সবে নিজ নিজ সাধনায়।

আসে বিধাতার শাসন-দণ্ড ঙ্গকুটি-কুটিল মুখে,
শিরে জটাভার নয়নে বহিঃশুশ্রূ শোভিত বুকো।
সদা কাজভার সাধ? আপনার প্রলোভন মোহ নাশি,
জাগ্রত রহ দুৰ্বাসা কবে কখন পড়িবে আসি।

সত্য

শিশুটিরে ফেল্লে যখন জলে,
ডুব্ল না সে, নাচল কমলদলে,
বিস্ময়ে তাই দেখলে হাজার লোকে,
জলের পরে আস্ছে দুলি দুলি।

ফেলে দিল সিংহ করীর পায়ে,
ধূলা তারা ঝাড়ল তাহার গায়ে,
কেশরীতার চাটল চরণ রাজা,
হস্তী তাহায় পৃষ্ঠে নিল তুলি।

আগুনে তায় ফেল্লে অবোধ যত,
নিভল আগুন। ইন্দ্রধনুর মত
তোরণ হয়ে জ্বাগুল তাহার শিরে,
মুছে দিল গায়ের যত মলা।

প্রহ্লাদ-এ সত্য শিশুটিরে
জ্বলাদে তার করবে বল কিরে?
আহ্লাদে সে করবে হরিনাম,
যত কেন বাঁধ তাহার গলা।

মণিময় ও স্তম্ভ ভেঙ্গে চুরে
নৃসিংহ যে জাগবে দানবপুরে,
মিথ্যাসুরের সব মায়াজাল ছেদি’

ভাঙতে ফাঁকি, রাঙা নখর বহি।
ভ্রাস্তি দ্বিধা মিথ্যা ধরি ধরি
উদর চিরে ফেল্বে জানুর পরি;
জোড় করেতে দেখবে চেয়ে চেয়ে
শেষ কালেতে সত্য হবে জয়ী।

ধ্রুব

উত্তম যা' ভাবছো মনে মনে,
তা'রে আজি বসাও রাজাসনে,
ধ্রুবেরে আজ পাঠাও কেন বনে?
মুক্ত সে গো খুঁজবে নিজ পথ।
সুরুচিতে চিত্ত রোক মজি,
অধ্রুবেরে নিত্য রহ ভজি,
সুনীতিরে করবে কর দূর,

পুরুক তোমার মোহের মনোরথ।

ধ্রুব সেত কঠোর তপোবলে
উঠবে জিনে ধাতার পদতলে,
সুনীতি সে হ'বেই রাজমাতা

সবার উঁচু পণ্য ধ্রুবলোকে।

ভোগের মোহে মিথ্যা মায়াজালে
পাবেনাক তৃপ্তি কোনো কালে,
চাইতে হ'বে ধ্রুব লোকের পানে

চিরকাতর সজল রাঙা চোখে।

ধ্রুবের তপ-সত্য-বিনা তাই,
আত্মা, তোমার মুক্তি গতি নাই;
ধ্রুবের আলোক ভিন্ন ভবনদে

নাবিক তুমি হবেই পথহারা।

ভোগ সুখের মিথ্যা প্রহেলিকা
আয়ু বিহীন ভ্রান্ত অনল শিখা;
নিশা শেষে নিভ্বে তাহার প্রাণ,
অনন্তকাল জ্বলবে ধ্রুবতারা।

BANGLADARSHAN.COM

জীবন-মরণ

মরণ আমার বঁধু অইরে ডেকেছে অই,
পশেছে বাঁশরী স্বর আমার কাণে,
'কোথায় জীবন মম, কইরে জীবন কই'—
বাঁশী যে ডাকিছে ঐ আকুলি প্রাণে।
ভব-নদী কলকল যমুনার মত চলে,
যাইরে কলসী কাঁখে সলিল আনার ছলে;
কালোরূপে আলো করি নীপমূল হোথা সই,
উতলা করেছে প্রাণ বাঁশীর গানে।
মরণ আমার বঁধু অই লো ডেকেছে অই,
মরমে পশেছে স্বর পশিয়া কাণে।

হৃদয় জ্বলিছে মোর, নয়ন তৃষিত হয়!

বুকে কোটি বরষের অসীম ক্ষুধা,
মরণে লভিয়া আমি অমর হইতে চাই,
মরণের বুকে আছে মিলন-সুধা।
মানিনাক সংসার! সমাজ-শাসন তব,
শোভন ভূষণ আর কিছু সাথে নাহি ল'ব,
সঙ্গে শূন্য শুধু সাধনা-কলসী মোর,
মানিবে না কোন ডোর জীবন-রাধা।
ননদী শাশুড়ী হ'য়ে ওগো প্রেম-মায়া-মোহ,
নাথের মিলন-পথে হ'য়ো না বাধা।

ওরে ও অবোধ জন, এ নহে দুখের কথা,
কালিমা ঢেলো না প্রেমে সে কথা বলে';
ভুবন-মঙ্গল এ যে জীবন মরণ সঙ্গ,
জীবন জুড়াবে যেরে মরণ-কোলে।

শিহরি উঠিবে নীপ যমুনার তট'পরি,
কুহরি কোকিল গা'বে নিখিল মুগ্ধ করি,

জীবন জুড়াবে আজ মরণ অমৃত রসে,
‘জয় রাধা শ্যাম’ শুভ মধুর বোলে,
মরণ-মঙ্গল-তানে জীবন-সঙ্গীত গাও,
জীবন জুড়াবে যেরে মরণ-কোলে।

BANGLADARSHAN.COM

রূপ ও ধূপ

ওগো রূপ,-অপরূপ!

তোমার দেউলে আপনা দহিল

কত যে সুরভি ধূপ।

অচল নিঠুর! চরণের মূলে

তবু একবার চাহিলে না ভুলে?

পড়িল না দাগ কঠোর তোমার

ধাতুর বক্ষ' পরে!

কামনা-উজল বদন তোমার-

কিসের গরব? -ধূপ আপনার

পরানের পূত সৌরভ-ধূমে

দিয়েছে মলিন করে।

ঐ পুড়ে যায়, একটুকু বাকী!

মেল একবার পাষণের আঁখি,

তুলিতেছে শরে লোচন-রাজীব,

তা'ও কি অর্ঘ্য নিবে?

হবে না কি দেহে কৃপা-শিহরণ?

বিঁধিছে বক্ষঃ কেড়ে প্রহরণ!

হোমানলে ঐ ঘেরিয়া ঘুরিছে,

আপনা আহতি দিবে।

ওগো রূপ-অপরূপ!

মেল একবার পাষণ লোচন,

দহে মলো কত ধূপ!

BANGLADARSHAN.COM

পল্লীবধু

না ধরিতে প্রাচী লোহিত বরণ, না ডাকিতে সব পাখী,
গ্রাম পথে ঘাটে না পড়িতে সাড়া, না মেলিতে ফুল আঁখি,
কে গো ঐ জাগি শয্যা তেয়াগি, দ্বারে দ্বারে ডালে জল?
গোময় মাড়ুলে লেপনে জাগায় পুণ্য তুলসী তল!
উঠান ছাড়িয়া না উঠিতে রোদ ঘরের পৈঠা পরে,
কলস ভরিয়া জল লয়ে কেবা স্নান করি ফিরে ঘরে?
না বাড়িতে বেলা দেবদেউলের দূর করি মলিনতা,
করে আহ্নিক, রন্ধনতরে গুরুজনে সহায়তা।
লজ্জা-সরম সজ্জা পরম অন্তরভরা মধু,
অবিরত সেবা-সাধন-নিরতা এ যে গো পল্লীবধু।
গুরুজনেদের ভোজনের শেষে অতিথি ভিখারি তুষি,
ছেলেপুলেগুলি নাওয়ায়ে ধোওয়ায়ে খাওয়ায়ে করিয়া খুসি,
পাতের অন্নে উদর পূরিয়া এঁটো কাঁটা খুঁটে তুলি,
হাঁস-ঝটপট খিড়কির ঘাটে কে ধোয় বাসন গুলি?
সুঁচ সুতা লয়ে সারি শত কাজ, কত কাজ ঝাঁটপাটে,
পাড়ার মেয়ের খোঁপা বেঁধে দিয়ে চলে কে দিঘীর ঘাটে?
গৃহ-পারাবতে আহারে তুষিয়া তরুমূলে জল দিয়া,
সাঁজ দীপগুলি করি পরিপাটি রাখে কে গো সাজাইয়া?
লজ্জা-সরম সজ্জা পরম অন্তরভরা মধু
অবিরত সেবা-সাধন-নিরতা এ যে গো পল্লীবধু।
সাঁজের বাতিটি জ্বালিয়া তাহারে বাঁচায়ে আঁচল আড়ে,
তুলসীর তলে দেবের দেউলে ঘুরে কে গো দ্বারে দ্বারে?
খোকা খুকীদের উপকথা বলি, খেয়ে মুখে শত চুম,
অশেষ প্রশ্নে উত্তর দিয়া পাড়ায় তাদের ঘুম।
শুশুর শাশুড়ী পদসেবা করি লভিয়া আশীষ শিরে,
সবার ভোজন শয়নের শেষে চলে কে শয়নে ধীরে?
শয়নের গৃহে শ্রান্ত পতির সেবারতা পদমূলে,
চরণের পরে রাত্রি দুপুরে কে গো ঘুমে পড়ে ঢুলে?

লজ্জা সরম সজ্জ পরম অন্তরভরা মধু,
অবিরত সেবা-সাধন-নিরতা এ যে গো পল্লীবধু।

উচ্চ হাসিটি শোনে নাই কেহ, নাহি রাগ অভিমান,
আঁখিপুটতলে নয়নের জলে কোথা ব্যথা অবসান।
গৃহকোণ কোথা গৃহকাজরতা কেহ ত পায়না সাড়া,
লুকায়ে লক্ষ্মী নেমেছে এ বাড়ী জানে তাহা সারা পাড়া।
ননদীর গালি ছাড়া কোন কথা কাণ হতে নাহি ফিরে,
বহিতেছে অবগুণ্ঠন-তলে মৌন মহিমা ধীরে।
গৃহকাজে কর হয়েছে কঠোর, শাঁখাটি হয়েছে সাদা,
কাহার কঠিন লৌহবলয়ে লক্ষ্মী পড়িল বাঁধা?
লজ্জসরম সজ্জা পরম অন্তরভরা মধু,
অবিরত সেবা-সাধন-নিরতা এ যে গো পল্লীবধু।

BANGLADARSHAN.COM

কৃষাণীর ব্যথা

সুখের ঘরটি গড়িয়া তুলিয়া বুকের রক্ত দিয়া,
আজি কোথা তুমি চলে গেলে ওগো সংসার আঁধারিয়া?
ধানে ধানে আজি আঙিনা ভরেছে ঠাইটুকু নাই আর,
মঙ্গলা আজি ঢালিতেছে দুধ বাছুর হয়েছে তার।
মাচান ছাপিয়ে কুমড়ার লতা ভুঁয়েতে লুটিয়া পড়ে,
পালঙের শীষে শাকের চাকড়া গিয়াছে আজিকে ভরে’,
রজনীগন্ধা গাঁদা বেলী আজি রাশি রাশি পড়ে ছলে’,
আজি সংসার সবি ভরপুর তুমি শুধু গেছ চলে’!

দুবেলা পাওনি পেটভরে খেতে গিয়েছিল দেহ ভেঙে,
লুকিয়ে চোখের জল মুছে তুমি ভিক্ষা এনেছো মেঙে।
একমুঠো চাল চিবাতে চিবাতে মাঠেতে গিয়াছ চলি,
উপোষ করিয়া কাটায়েছ রাত্তি ক্ষুধা নাই মোরে বলি।
দুপুরের রোদে বর্ষার জলে খাটিয়া দিবসরাত,
কনকনে শীতে রাত্রি জাগিয়া করেছ জীবনপাত।
সাঁঝের বেলায় খেটেখুটে এসে এলায়ে পড়েছ ঘুমে,
রাত্রি না শেষ হইতে আবার চলেছ খোকারে চুমে।

খাজনার লাগি জমিদার দোরে সহেছ যাতনা কত!
মহাজন দেনা সুদের লাগিয়া গঞ্জনা দেছে শত।
চুপ করে সবি সয়েছ কাতরে দুটি হাত জোড় করে’,
সকলের কাছে সময় নিয়েছ পায়ে হাতে ধরে’ পড়ে।
রোগে পড়ে’ থেকে সংসার নিয়ে কতই দিয়াছি জ্বালা,
ক্ষুধায় কাঁদিয়া করেছে ছেলেরা তব কাণ ঝালাপালা,
যাতনা দুঃখ কত না সয়েছ কথাটি ছিলনা মুখে,
ফিরে এস আজ, ঘরটি তোমার ভরিবে সোণার সুখে।

ঘনায় আসিছে সাঁঝের আঁধার, নাহি মোর কিছু কাজ,
ঘরে দুয়ারেতে পড়েনিক ঝাঁট, জ্বলেনি এখনো সঁজ।
চালের বাতায় ঝাঁ ঝাঁ পোকাগুলো বুক চিরে চিরে ডাকে,

উঠিতে বসিতে টিকটিকি পড়ে ফাটা দেওয়ালের ফাঁকে।
শোওনাক তুমি ‘পীড়ের’ উপর আরতো গামছা পাতি’
ঝুলিতেছে ঐ লাঠি ‘চোঙ’ আর ‘মাথালী’ তালের ছাতি,
ঘাটের ধারের বাঁশবন পানে সারারাতি চেয়ে কাঁদি,
ঐখান হ’তে নিষ্ঠুর বাঁধনে লয়ে গেছে তোমা বাঁধি।

তেমনি পড়িছে কালো ছায়া ঐ ভরিয়া বকুলতল,
বৈকালে যথা এলানো শরীরে চাহিতে ঠাণ্ডা জল।
সাঁঝে ভোরে নিতি পাখীগুলো ডাকে বুকটা কেমন করে,
বেলা হয় তবু গরুগুলি সব বাঁধা রয়ে যায় ঘরে।
পথ চেয়ে শুধু বসে থাকি ঠায়, জ্বলেনা দুপুরে ‘আখা’,
তুলসী তলায় পারের দাগটি এখনো রয়েছে আঁকা।
মালতী তোমার ফিরিয়া এসেছে শ্বশুরের ঘর থেকে,
খোকা যে তোমার হাঁটিতে শিখিছে, একবার যাও দেখে।

এত সব ফেলি, জনুর মত চলে যাওয়া কিগো সাজে,
তবে কি গো তুমি প্রবাস গিয়েছ আমাদেরি কোনো কাজে?
বাবুদের আর পাড়ার লোকের অত্যাচারের ভয়ে,
চলে গেলে কি গো মনের দুঃখে কিছু নাহি বলে’ কয়ে?
তাই যদি হয়, ফিরে এস তুমি, তোমারে সঙ্গে পেলে
খোকারে লইয়া পলাইয়া যাই বাড়ীঘর সব ফেলে।
ভিক্ষা মাগিব, কাঠ কুড়াইব, ফিরিব না আর বাড়ী,
আঁচলের গিঠে বাঁধিয়া রাখিব, তিলেক দিবনা ছাড়ি!

কৃষকের ব্যথা

এমন করে' কেমন করে' আঁধার ঘরে আর,
তোমায় ছেড়ে রইব আমি লয়ে তোমার ভার?
ঘর দুয়ারে পড়েনা জল, উঠানে নাহি ঝাঁট,
বিহানে তব গোয়ালঘরে করেনা কেহ 'পাট।'
দুপুরবেলা রান্নাঘরে উনুন নাহি জ্বলে,
গরুবাছুরে 'খামারে' ধান খেয়ে যে যায় চলে!
সন্ধ্যাবেলা পড়েনা সাঁঝ, গোয়ালে নাই ধোঁয়া
'মাদুর' পেতে কে দিবে? মোর গামছা পেতে শোওয়া!

বারেক ফিরে এসে,
লক্ষ্মী মোর তোমার ঘরে লহগো ভার হেসে।

একটি ছেলে কাঁধে যে মোর, খোকাটি রহে কাঁখে,
তিলেক নাহি ছাড়িবে খুকী, মাঠেও সাথে থাকে;
ক্ষেতের ধারে খোকাটি তব 'নালায়' গড়াগড়ি,
সকল কাজে খুকিটি মোর ঘাড়তে রহে পড়ি',
'টোকায়' করি 'বিহানে' তারা পায়না মুড়ি লাড়ু,
সময়ে নাওয়া নাইক খাওয়া, ঘুমটি নাহি কা'রু,
দুপুর রাতে ভাঙিলে ঘুম কাঁদিয়া তোমা চায়,
চোখের জল শুকায় গায়ে—মু'ছাবে কেবা তায়?

বারেক ফিরে এসে,
বদন চুমি' তোমার ছেলে লহগো তুমি হেসে।

ক্ষেতের কাজ করিতে গিয়ে উদাস হয়ে যাই,
কাজেতে আর নাইক মন, আরামে সুখ নাই।
তোমার সেই কাজল চোখ মনে যে উঠে 'জ্বলি',
ধানের চারা উপরে ফেলি আগাছা কাঁটা বলি।
বাড়ীতে ফিরে 'জিরানো' নাই, চড়াতে হয় হাঁড়ি,
যে কাজ শুধু তোমারে সাজে, আমি কি তাহা পারি?
জ্বলেনা 'আখা'—ভাঁড়ার ঘরে কিছু না খুঁজে পাই,
ফেনে যে ঢালি নুনের সরা, ডালে যে ঢালি ছাই!

বারেক ফিরে এসে,
হলুদ মাথা সাড়ীটি পরি', আলতা পরো হেসে।

শান্তিপুর্বে তোমার ডুরে এ বুকুে চাপি ধরি,
চোখের জলে বক্ষ ভাসে, মেজেতে রহি পড়ি।
কাহারে আজি পরায়ে দিব সে আটবে কী গোট?
যাহার লাগি ফাগুনমাসে ধরিয়াছিলে 'খোট।'
মনে যে আসে রোগের মাঝে সকলসহা মুখ,
পায়ের ধূলো মাথায় লওয়া, শিউরে উঠে বুক!
ফেলিয়াছিলে বর্ষাকালে উঠানে যে পা' দুটি,
এখনো তার রয়েছে দাগ গোলার পাশে ফুটি।

বারেক ফিরে এসে,
যতন করে মুখটি মেজে খোপাটি বাঁধো হেসে।

BANGLADARSHAN.COM

কুড়ানী

পো'ষের বিষম কনকনে শীত, তখনো হয় না ভোর,
পূবের আকাশ হয়নাক লাল, মাঠ ঘাট ঘোর-ঘোর,
মাদুর ছাড়িয়া উঠি তাড়াতাড়ি ছেঁড়া কাঁথা গায়ে দিয়ে,
মাঠেতে বেরুই কুড়াইতে ধান ছোট্ট বুড়িটি নিয়ে।
ক্ষেতে ক্ষেতে ঘুরি শামুকে করিয়া খুঁটে খুঁটে তুলি ধান;
গোটা শীষ যদি দেখি ভুঁয়ে পড়ে' উথলিয়া উঠে প্রাণ।
হাঁটিয়া হাঁটিয়া এমনি করিয়া সারা হয় ধান খোঁজা;
নিয়ে যায় ঘরে পাড়ার লোকেরা রাশি রাশি বোঝা বোঝা,
পিছু পিছু যাই বুড়িটি লুকায়ে বা'র করি মোর বুলি,
যেটি ভুঁয়ে পড়ে তাড়াতাড়ি গিয়ে সেটি খুঁটে লই তুলি।
ঠোঁট, মুখ, গাল শীতে জর জর, পা দুটা গিয়াছে ফাটি!
ছুটে আসি যাই—কি করিবে বল মাঠের 'কুচল' মাটি?
ছোট্ট বুড়িটি হয় চুর চুর, ভরে যায় মোর ঝোলা,
লোকে কয়, 'চাষে কি করিবি তোরা? কুড়ানী বাঁধিবে গোলা!'

শীত যায় যায়, ক্ষেতে নাহি ধান, ধূ ধূ করে সারা মাঠ,
গাছের তলায় শুকানো পাতায় ভরে যায় পথ ঘাট।
ছোট্ট বুড়িটি রাখিয়া এবার বড় বুড়ি লই কাঁখে,
শুকনো পাতায় উঠানে আমার ঠাইটুকু নাহি থাকে।
দুপুরে গোবর-বুড়িটি লইয়া ফিরি রাখালের পাছে,
বাজে কথা কয়ে' ঘুরি ফিরি গরু বাছুরের কাছে কাছে।
বিকালে বেরুই কুড়াইতে কাঠ বনে বনে ঘাটে মাঠে,
পড়সীরা কয়—ধন্য কুড়ানী! সারা দিনটাই খাটে।'

বর্ষা পড়িলে পথে ঘাটে কাদা, নিবে আসে খরতাপ,
তালের পাতায় বাঁধা চালাটিতে জলপড়ে টুপটাপ।
কাঠ খড় কিছু মিলেনা কোথাও, জ্বলেনা কাহারো আখা,
আমার দুয়ারে আসেন সবাই হাতে লয়ে' বুড়ি ঝাঁকা।
নালা জলেতে জালিটি পাতিয়া বসে' থাকি আমি ঠায়,
চুনো পুঁটি দুটা আঁচলে বাঁধিয়া ফিরি কাদামাখা গায়।

বর্ষা ফুরায়, লাউ কুমড়ায় গোটা চাল যায় ভরে’,
পুকুরে পুকুরে কলমী শুশুনী ভরে’ আনি ঝুড়ি করে।
নালাটি শুকায়, কাঁকড়া লুকায়, মাছ খুঁজে মরা মিছে,
গুগলি শামুক কুড়ায়ে বেড়াই রাখালের পিছে পিছে।
তালটি বেলটি কুড়ালে লোকেরা হাঁ হাঁ করে আসে ছুটে,
আমার কপালে,—লোকে যা’না ছোঁয়, নিতে হয় তাহা খুঁটে’।

এমনি করিয়া তিলটি কুড়ায়ে তালটি করিয়া জড়,
কুড়ানো ভাতেতে পেটটি পূরিয়া হইয়াছি এত বড়।
খোঁড়া মা আমার ঘরে পড়ে’ আছে, বাপ মরা মনে নাই,
ঘরটি পুড়িলে পাড়াপড়সীরা দেয়নিক কেহ ঠাই।
‘কাঁচা আলে কারো দেই না পা আমি,’ মনে মনে তেজ আছে,
চাকরি করিনা, শিক্ষা করিনা, ধারিনা কাহারো কাছে।

অনেক বকেছি, কুড়ানী বলিয়া ডাকিও না মিছে পিছু,
মাঠেতে হাঁটিলে ঝুড়িটি ভরিবে, খুঁজিলে মিলিবে কিছু।

BANGLADARSHAN.COM

হা-ঘরে’

হা-ঘরে’ সে ঘুরে’ বেড়ায় সঙ্গ লয়ে’ গৃহস্থালী,
জীবন-ভরা পুঁজি তাহার বাঁকঝুলান দুটি ডালি,—
কোলের ছেলে, সাপের ঝাঁপি, ভাতের হাঁড়ি, মাটির থালা,
ডুগডুগি আর তেলের চোঙা, সবুজ কাচের কণ্ঠমালা।
আকাশ তাহার ঘরের চালা,—রবিশশীর আলোকজ্বলা,
মাঠ বাট তার বাড়ীর উঠান, বিলাসভবন গাছের তলা,
ঝোপের মাঝে জন্ম-আগার, জল খায় সে পুকুর-ঘাটে,
সেইখানে তার রাত্রিনিবাস যথায় রবি বসে পাটে।
কোন’ রাজার নয়ক প্রজা বিশ্বমহারাজের বিনে,
মুখপানে কার চায়নাক সে, থাকেনা সে কার’ ঋণে।

সকল বাঁধনহারা সে যে জানেনাক সমাজরীতি,
জীবনপথে লক্ষ্যহারা,—মানেনাক স্বাস্থ্যনীতি।
আজকেরি তার আছে পুঁজি, কালকের তাও ভাবনা নাই,
বস্তুজগৎ জয় করেছে—ঝঞ্ঝা বাদল, আপন ভাই।
অতিথি সে হ’বার লাগি যায়না ধনীর তোরণ-তলে,
বৃক্ষতলের অভ্যাগত, তাও শুধু একদিনের ছলে।
একটি দিবস গাছের ডালে ঝোলে তাহার ভাতের হাঁড়ী,
গাঁয়ের ছেলে দেখতে জমে একটি দিনের তাহার বাড়ী।
ভালুক তাহার আদেশ পেলে কোঁ কোঁ করে’ জ্বরটি আনে,
সর্প ফণা নত করে’ ঢোকে ঝাঁপির মধ্যখানে।

জানেনাক ভিক্ষা করা ‘মোসাহেবি’ প্রবঞ্চনা,
প্রাণের অভাব সব চুকে যায় পেলে পরে একটি কণা।
জীবিকা তার সাপ খেলান, নানা রকম বাজীর খেলা,
মনে পড়ায় বাজীর ছলে বিশ্ব বাজীকরের মেলা।
কোন’ শাসন রক্ষনয়ন পারেনিক বাঁধতে তারে,
সকল আইন হৃদ হয়ে’ বন্দী হ’ল তাহার দ্বারে।
সহচরের পতন হেরি থামেনাক যাত্রাপথে,

যুধিষ্ঠিরের মতন চলে অটল দৃঢ় স্বর্গরথে।
বাঁধনহারা মুক্ত পুরুষ অগ্রগামী অনেক দূর,
দূরে বুঝি জাগছে চোখে দিক-সীমাতে স্বর্গপুর।

BANGLADARSHAN.COM

মানসী-মূর্ত্তি

মাধুরী জাগি' মঞ্জুরিয়া রচিল তনু-তনিমা,
পুঞ্জীভূত সুষমা নর-নয়ানে;
প্রেম উঠেছে গুঞ্জুরিয়া লইয়া মোহ-মহিমা
ফুটিল হয়ে মঞ্জুভাষা বয়ানে।
খলকমল ফুটায় চলে চুম্বি' চারুধরণী
বিনয়টুকু, লুটি'ছে হ'য়ে চরণ;
শান্তি সে যে চিকুররাশি দুলি'ছে ঘনবরণী,
নিখিল তা'র তলেতে লয় শরণ।
পুণ্য শুচি বিমল-রুচি, জ্যোছনা যেন উছলি'
হইয়া হাসি ভাতিছে সিত রদনে;
লোহিত লাজ, অধররূপে বিস্বরাগে উজলি'
লাজেতে সদা লুকাতে চাহে বদনে।
শুভ বাসনা, রাগা ভূষণে লভিয়া শিব শোণিমা
কপোল হয়ে ফুরিছে কিবা পুলকে!
মধুর ধীর উদার ভাব, বহিয়া নিজ গরিমা,
জাগে ললিত ওই ললাট-ফলকে।
সাধবীজন-সুলভ তেজ, নাসিকা হ'য়ে ফুরিছে,
দৃঢ়তা রাজে জয়ুগ হয়ে ভালে রে;
সাধনা সেবা, দু'কর হয়ে' আঁখির জল দূরিছে,
নিখিল জনে স্বরণ-সুধা ঢালে রে।
নয়ন দুটি হইয়া ফুটি করুণা, ছলছলিয়া,
তাপিত জনে শান্তিদানে স্নাপিছে;
ঋজুতা, আহা চিবুক হয়ে' রয়েছে ঢলঢলিয়া,
সৌম শম, কণ্ঠ হয়ে কাঁপিছে।
মঙ্গল, সে অঙ্গ ভরি' ভঙ্গি হয়ে' ভূষিয়া
শান্তি-শুভ-সুন্দরতা বিতরে;
স্বর্গ, সে যে স্বস্ত হয়ে' তোমাতে আছে মিশিয়া,
পীযুষ-প্রেমানন্দ ভরে' নত রে।

সতী জননী-হৃদয়শতে তব হিয়ার স্ফুরতি,
আকুল-প্রাণ-নিখিল জনশরণা;
সকল শিব পূত গুণ- মিলনে নব মূর্তি,-
ধরণীমাবে ধাতার তুমি প্রেরণা।
তোমারি পূজা পুণ্যসেবা, তোমারি প্রেমে ডুবিয়া
দেবী বলিয়া তোমারে করি সাধনা;
তোমারে পাওয়া স্বরগলাভ, তোমারে তাই লভিয়া,
নিবিবে সব কলুষ ভব-বেদনা!

BANGLADARSHAN.COM

বধূ-বরণ

কনক-কুম্ভ ভরি' আনো তুমি সতীতীরের জলে,
কড়ি দিয়ে রচা সিন্দুরঝাঁপি হিন্দুর গৃহতলে।
তুলসীর লাগি আনো গো প্রদীপ, অশথের ঝারানীর,
গোধনের লাগি নীবার শষ্প, দেবশিলা লাগি ক্ষীর।
অন্নপূর্ণা, ক্ষুধিতের লাগি অন্নে ভর গো থালা,
তমসাতীরের বৈদেহী-চিত-পুষ্পে গাঁথো গো মালা।
বটতরুমূলজড়িত দেউলে আরতি বাজে না আর,
জাগ্রত কর হিন্দুর দেবে ঢালিয়া অর্ঘ্যভার।

ওগো পবিত্রা! নন্দনবনে তুলসীদলের মত
লৌহবলয়ে পবিত্র কর কাঞ্চনভূষা শত।
সতী রমণীর অনুমরণের অনলের শিখাসম,
সীঁথি-ভরা আনো সিন্দুররাগ তেজে উজ্জ্বলতম।
শতবরষের পূতজীবনের শতেক শুভ্র সূতা
শাঁখার আকারে বেড়ি লও হাতে হে দেবি মন্ত্রপূতা!
দেহে শোভে হেম,—লক্ষ্মী-গরিমা, শঙ্খে বাণীর ভাতি,
কমলাভারতী লভে গো আরতি যেন গেহে দিবারাতি।

অবগুণ্ঠিত কুণ্ঠার মাঝে তেজের মহিমা রাখ',
হাসি দিয়া শত গৃহ-কর্মের ক্লান্তির ব্যথা ঢাক';
দিনের কর্ম ফুটায় তুলিও যশের গন্ধ ভরা,
কথাগুলি যেন তোমার বলিয়া মধুরসে যায় ধরা।
চরণ-পরশে ফুটাও কমল গৃহ-প্রাঙ্গণ' পরে,
তায় অচপলা রহ গো কমলা, বরাভয় লয়ে' করে।
ধুলি মুঠি ধরি' সোণা মুঠি করি' ছড়াও ভিখারীদলে,
লোকে কয় যেন—'মাগো ভগবতি, আসিয়াছ কোন ছলে!'"

ফুলশয্যা

আজি সখি, আমাদের কুসুম-শয়ন।
মধুগন্ধে ভরপুর বায়ু বহে ফুর ফুর,
হিয়া দুটি দূর দূর, অলস নয়ন;
আজি সখি আমাদের কুসুম শয়ন,
আজি সর্ব-বিশ্বছাড়া, সর্ব-বাধাবন্ধ-হারা,
আবেশে মাতালপারা, এলায়িত তনু,
সংসারের ঝালাপালা ভুলে সর্ব দুখজ্বালা,
সুখরসে পরিপুর কর প্রতি অণু।
কাঁটা যদি রহে ফুলে, তার ব্যথা যাও ভুলে,
কাননে কাঙ্গাল করি কররে চয়ন।
আজি সখি, আমাদের কুসুম শয়ন।

কোটা প্রজাপতি পরে' রঙ্গীন পাখার ভরে
এলাইয়া দাও তনু জ্যোছনার ফেনে;
স্বপন-পুরীর দেশে চল সখি, চল ভেসে,
লাবণ্য-লহরীগুলি নিয়ে যাক্ টেনে।
পেয়ে অঙ্গুরীর চুম আসুক মায়ার ঘুম,
পরীর পাখার বায়ু উড়াবে অলক;
নন্দনের গন্ধভারে তিতায়ে চন্দনাসারে
পুলক-দোলার যেন দুলাবে দ্যুলোক।
বকুল মালিকা টুটি' তুলে রবে শির দুটি,
কদম্বের উপাধান করিবে বহন।
আজি সখি, আমাদের কুসুম-শয়ন।

মরকত-তট ছাড়ি' পিয়ে মৃগমদ বারি,
আকর্ষণ ডুবিয়া র'ব অমিয়া-সায়রে;
কলরবে মাতামাতি করিয়া জাগিবে রাতি,
মুখর পাপিয়া পিক উতলা বায়রে।
হেসে হেসে কুটি কুটি, পুলকেতে লুটোপুটি,
ইন্দ্রধনু গায়ে মোরা পড়িব গড়ায়ে,

কাদম্বরী-ফেনময় হবে পাত্র বিনিময়,
নিঙাড়ি নিঙাড়ি দিব মছয়া ছড়ায়ে।
ত্যজি' পৃথিবীর সাজ এস সখি এস আজ,
আলোর বসন দিব করিয়া বয়ন।
আজি সখি, আমাদের কুসুম-শয়ন॥

BANGLADARSHAN.COM

বালিকা-বধু

আমার বালিকা বধু,
অঞ্চল-ভরা সৌরভ তার, সঞ্চিত বুক মধু;
ফুটেছে ক্ষুদ্র যুথীর মতন,
স্নিগ্ধমধুর শুভ্র শোভন,
পাতার আড়ালে, নীহারসিক্ত, সৌরভ করে দান।
নীপের মতন নাহি শিহরণ,
নহেক মাদক বকুল যেমন,
চম্পকসম উগ্র গন্ধে ব্যগ্র করে না প্রাণ।
আমার বালিকা বধু,
অঞ্চলভরা সৌরভ তার, অন্তর ভরা মধু।

আমার বালিকা সখি,
কঙ্কণপরা কর দুটি তার, সঙ্কোচভরা আঁখি।
লতিকার মত লজ্জা-জড়িতা,
ছল ছল নীল-নয়না, চকিতা,
ললিত পেলব তনিমার মাঝে পুণ্য গরিমা ভায়।
সে যে একান্ত নির্ভরশীলা,
জানেনাক ছল, জানেনাক লীলা,
তরুর বাহুটি জড়িয়ে শুধুই ঘুমায়ে পড়িতে চায়।
আমার বালিকা সখি,
কঙ্কণপরা কর দুটি তার, সঙ্কোচভরা আঁখি।
বালিকা কান্তা মোর,-
শুভ্র রুচির অন্তর-বেলা, শুচি তার আঁখিলোর।
সে যে বসন্তে জাহ্নবীসমা,
বুকভরা মায়া, প্রীতি, দয়া, ক্ষমা,
সৈকত-অবগুণ্ঠন-তলে ভয়ে ভয়ে কিবা চায়!
নাহি বরষার বন্যা আবিল,-
শীতল, শান্ত, স্বচ্ছ, সলিল
ধীরি ধীরি এসে বহে যায় কিবা ঝিরি ঝিরি মহয়ায়।

দরদী দয়িতা মোর,—
শুভ্র রুচির অন্তর-বেলা, শুচি তার আঁখিলোর।

আমার বালিকা প্রিয়া,—
কণ্ঠ তাহার নিখিল ভুলায়, পোষ মানে তার হিয়া।
শারিকার মত নহে সে মুখরা,
কোকিলার মত নহে ত প্রখরা,
ময়ূরীর মত রূপের গরবে টলে' টলে' নাহি যায়।
সে যে মোর শ্যামা বনের পাখীটি,
গাহে শীষ গান, অচপল দিঠি,
আমার হৃদয়-কুলায়-মাঝারে আপনা লুকাতে চায়।
আমার বালিকা প্রিয়া,—
কণ্ঠ তাহার বণ্টে অমিয়া, পোষ মানে তার হিয়া।

BANGLADARSHAN.COM

প্রতীক্ষায়

আর নহে ভুল!

সত্য ঐ চরণের ধ্বনি পঞ্জরের সোপানে সোপানে
গুপ্তপদ পরশন দিয়ে মর্মে মর্মে রোমাঞ্চ যে আনে,
হৃদয়ের রঙ্গমঞ্চে লাস্য করে হর্ষ সমাকুল;

আর নহে ভুল!

একি ভ্রান্তি হয়?

গবাক্ষের ফাঁক দিয়ে ঐ যে আলোক দিল গো ঝলকি';
অন্তরের গুহ্যতম গুহা বিদ্যুতে যে উঠিল চমকি',
পরানের নাট্যশালা সহসা যে হলো আলোময়!

একি ভ্রান্তি হয়?

নিশ্চয় এবার!

মর্মে অনুরণিছে যে ঐ দূর হ'তে ভূষণ শিঞ্জন;
বাজাবে চাবির রিং ঠিক এমনিটি বিশ্বে কোন জন!
কেন বাজে একসাথে প্রাণে বাঁশী মুরজ সেতার?

নিশ্চয় এবার!

এ নহে বঞ্চনা!

দুয়ার যে কর-পরশনে আনন্দের ছেড়েছে নিশ্বাস।
জড়গৃহে উঠেছে শিহরি-কেমনে গো না করি বিশ্বাস?
মৃদু শব্দে খুলে দ্বার, উঠে পর্দা, নাহিক বঞ্চনা;

এ নহে বঞ্চনা।

শূন্য গৃহ

শূন্য এ গৃহ আজ!

দুয়ারে আজিকে পড়েনিক জল, জলেনিক আজি সাঁঝ।

তোমার কেশের গন্ধ-তৈলে এখনো এ গৃহ ভরা;

জাগিছে তৈল সিঁদূরে তোমার দেওয়াল চিত্রকরা।

সিঁদূর টীপের কোটা আরসী ঐ খোলা আছে পড়ি,

চুলের দড়িটি, চিরুণী তোমার ভূঁয়ে যায় গড়াগড়ি

তব পদ রেখা আঁকা।

এ গৃহমাঝারে সবেতেই হেরি তুমি রহিয়াছ মাখা।

আজি তুমি গৃহে নাই!

তবু, পায়ের শব্দ শুনিলে অমনি চমকি' ফিরিয়া চাই।

ভূষাশিঞ্জন কাণে শুনি' যেন চারিদিকে তোমা খুঁজি,

মনে হয়, সবি ছড়ান হেরিয়া এখনি আসিবে বুঝি।

শূন্য শয়ন পড়ি কাঁদে ঐ পদাঘাতে যেন দূরে,

কিছুই আমার খুঁজি' নাই পাই, সব গেছে যেন উড়ে।

কেমনে বলগো রই,

তোমার চরণ চিহ্নেতে ভরা এই গৃহে তোমা বই!

আজি আমি গৃহহারা!

পথে পথে ঘুরি, পথে পথে ক্ষ্যাপা, তোমা লাগি হই সারা।

নিশীথ শয়নে নাইক নিদ্রা, বেশভূষা অতি দীন,

কাজে একটুও লাগেনাক মন, বিশ্রাম,—সুখহীন।

ভিখারী আজিকে ফিরিয়া যেতেছে ঘন ঘন নিরাশায়,

আজিকে গৃহের পশুপাখীগুলি কেহ না আহাৰ পায়।

গৃহের লক্ষ্মী সম,

তোমা বিনা আজ হয়েছে আমার এ গৃহ শ্মশানসম!

কিশোরী প্রিয়া

আমার কিশোরী প্রিয়া পলিত ধরারে যেন

করেছে কিশোরী,

জীর্ণ এ জগত যত অবসন্ন জীর্ণ কথা

গিয়াছে বিসরি।

জরার জড়তা গেছে, নিত্যদৃষ্ট গ্লানিম্মান

সব গেছে দূর,-

সবি যেন রাঙ্গা রাঙ্গা, কচি কচি ঢল ঢল

পেলব মেদুর।

পুরানো সঙ্গীত-মাঝে এবে মম প্রাণে বাজে

অভিনব তান,

আমার জীবন-নদী বন্যায় উথলি' উঠি'

বহিছে উজান।

নূতন আলোকে হেরি সবি আজি অভিনব,

লাবণ্য-চঞ্চল;

এক গাল হাসি হেসে পরি টিপ ধরা যেন

বেঁধেছে কুস্তল।

কিশোরী দেবীর মোর সভক্তি আহ্বানে আর

পুণ্য আয়োজনে,

জীর্ণ ভগ্ন দেবালয়ে দেবতা জেগেছে আজি

শঙ্খঘণ্টাস্বনে।

পুরাণো অলির গান, ফুলহাসি নদীতান

সবি লাগে ভালো,

মদির স্বপন মম জগতে জাগিল মম

প্রভাতের আলো।

সহসা যৌবন-লক্ষ্মী মানবের দ্বারে দ্বারে,

জাগাল জীবন;

অভিসারে রসাবেশে, পুলক রোমাঞ্চে আজি

ভরিল ভুবন।

BANGLADARSHAN.COM

মম গৃহ-লক্ষ্মী হ'য়ে প্রকৃতি মালিকা করে
সীমন্তে সিন্দুর,
আজিকে আমার লাগি দাঁড়ায়েছে সালঙ্কারা
হাসিয়া মধুর।

BANGLADARSHAN.COM

পাহাড়িয়া প্রিয়া

ওগো পাহাড়িয়া প্রিয়া,
হেথায় গৃহের কুঞ্জে তোমার
কি দিয়ে তুষিব হিয়া?
কোথায় তমাল পিয়াল সর্জ্জ,
ছাতনী সেগুন নীপ?
মহল গাছের ললাটের' পরে
কোথা সে চাঁদের টিপ?
শিরীষ ফুলের কেশর শিহরি'
পবন হেথা না ফুরে;
মহয়ার বনে মাতাল হইয়া
মৌমাছি নাহি ঘুরে।
বনদেবী হেথা শৈল-সোপানে
এলায় না তার বেণী,
কোথা দিগন্তে কাজল বরণ
গিরি' পর গিরি-শ্রেণী?
পাষণ-বক্ষ চিরিয়া হেথায়
বহে না বিমল বারি,
সিকতা-হৃদয় বিদারি' এখানে
ভরেনাক কেহ ঝারি।
কোথায় উদার মুক্ত জীবন
শৈলের পাদ-মূলে?
চপল চরণে কোথা ছুটাছুটি
গিরিনদী কূলে কূলে?
ওগো পাহাড়িয়া প্রিয়া,
হেথায় গৃহের অঙ্গনে তব
কি দিয়ে তুষিব হিয়া?
ওগো পাহাড়িয়া বালা,
লয়ে এস' করে লতায় বলয়,

BANGLADARSHAN.COM

গলে বন-ফুল-মালা।
প্রকৃতি হেথায় কল্যাণী-রূপে
বেঁধেছে কুটিরখানি,
আলিপনাভরা আঙিনার তলে
এস গিরি-বন-রাণী।
হেথায় জড়িয়ে শতেক বন্ধ,
গৃহ-কাজ হেথা শত,
মানবের পুত হিয়া-ছায়া-তলে
তৃপ্তি লতিবে কত?
ফুল-পল্লব- ভূষণ তেয়াগি
গৃহের ভূষণ পর',
টানো শির' পরে লাজ-গুণ্ঠন,
শঙ্খ-বলয় ধর।
লহ সীমন্তে সিঁদুর-বিন্দু
বাঁধ কুন্তল-রাশি,
অচপল হোক্ চরণ-যুগল,
সংযত হোক্ হাসি।
পিঞ্জরে হেথা পরিয়াছে বাঁধা,
মুক্ত স্বাধীন পাখী;-
হরিণ-নয়নে ঘেরিয়া দাঁড়াল
শতেক মানব-আঁধি।
ওগো পাহাড়িয়া বধু,
তার মাঝে আনো প্রকৃতি-ফুল্ল
অন্তর-ফুল-মধু।

BANGLADARSHAN.COM

মুক্ত আবাহন

ওরে মল্লয়াবনের সাকী,
অধর-পিয়ালা ভরি' আন সুরা, বকুল-পরাগ মাখি।
টল টল রাঙা গণ্ড-গেলাসে,
দ্রাক্ষার রস রভস-বিলাসে,
আঙুরের পানি কাঁখে আন ছানি, কনক কলসে ঢাকি';
ওরে মল্লয়াবনের সাকী!
মূরছি চরণে পডুক হৃদয়,
পিয়ে পিয়ে আজি মোহাবেশময়,
নেয়ে নেয়ে তোর রূপ-সরোবরে ডুবে যাক্ দুটি আঁখি;
ওরে মল্লয়াবনের সাকী!

ওরে পাষাণ দেশের রাগি,
আনরে বাহুর অটল অটুট পাষাণ নিগড়ুখানি।
পাষাণি! পাষাণ বক্ষকারায়,
চন্দন-রস-নিঝর-ধারায়,
বন্দী যেন গো আপনা হারায়, না শুনে মুক্তিবাণী।
ওগো পাষাণদেশের রাগি!
বীরবালা, আজি রণ অবসান,
চরণে সঁপিণু কবচ কৃপাণ,
বিদ্রোহী পায়ে পড়িছে লুটায়ে, চির পরাজয় মানি।
ওগো, পাষাণ দেশের রাগি!

ওগো, কাজল দেশের প্রিয়া,
এস গো উজল আঁখির ভুরুর অঞ্জনলতা নিয়া।
দিগন্তভরা শৈল বনানী,
জলদ-কুহেলি কালো দীঘি ছানি'
নিচোলে চিকুরে, উজল কাজল রাখিয়াছ সন্ধিয়া।
ওগো কাজল দেশের প্রিয়া।
নীল অম্বরে ডুবে যাক্ পাখী,
ঢাকি দাও আঁখি অঞ্জন আঁকি,

স্বপন দেখাও, যাদুকরি! মারা-অনুরঞ্জন দিয়া;-

ওগো কাজল দেশের প্রিয়া!

ওগো স্বপন-দেশের পরী,-

এস রঞ্জিত ইন্দ্রধনুর মালিকা হস্তে ধরি।

তারার কুসুম ছড়াতে ছড়াতে,

ছায়াপথ বেয়ে এস গো ধরাতে,

সোনার প্রদীপে জোনাকি-ফিন্‌কি পড়ে' যাক্ ঝরি' ঝরি';

ওগো স্বপন দেশের পরী!

প্রজাপতি রচা দুইটি ক্ষেপনী

জ্যোছনার স্রোতে ছুটে যে আপনি,

সে দুটি পাখায় ঢাকিয়া আমার সংজ্ঞা লহ গো হরি';

ওগো স্বপন দেশের পরী!

BANGLADARSHAN.COM

রজনী-শেষে

উঠ সখি, জাগ জাগ, পোহার রজনী।
দূরে শুনা যায় ঐ কুঞ্জভঙ্গান,
ভোরের বৈরাগী শুন বাজায়ে খঞ্জনী
'টহল' গাহিয়া দিল চমকিয়া প্রাণ।
নগ্ন সুষমার দেশ স্বপ্নপুরী হ'তে,
গৃহকুঞ্জে ফিরে এস, ওগো মায়াময়ি!
ভিড়াও মানসতরী কর্ম্মতট-পথে,
চমকি' জাগিয়া উঠি' অসম্বৃতা অয়ি!
ধীরে খোল আবরণ-পরীর পালক,
এলায়িত যৌবনেরে বাঁধ চেতনায়,
মুছি' রাগালস আঁখি গুছায়ে অলক,
আপনা সম্বরি' তোল লাজরক্তিমায়।
ধীরে ফেলি পদযুগ, লো অবগুষ্ঠিতা,
গৃহের বাহির হও সলজ্জ কুষ্ঠিতা।

BANGLADARSHAN.COM

অপরাধ কার?

মিছে সখি, ধরা অপরাধ।

আপনাতে দৃষ্টি নাহি, শুধু মোর পানে চাহি’,

মিছে রোষ করি’ সখি, ঘটাস প্রমাদ।

জানিস্ ত চিরদিন ভুঙ্গ নহে লোভহীন,

তপ আচরিতে সে গো ঘুরেনাক বনে,

মধু-গন্ধে পুলকিয়া রূপভাতি ঝলকিয়া,

কমল ফুটালি কেন উজল আননে?

যেন পাকা বিশ্বফল রসভরা ঢল ঢল

কেন এত সুমধুর অধররতন?

শুকের কি উপবাস? শুধু কি তুষার শ্বাস?

ক্ষুধা যে জীবন-ধর্ম তাহা কি নূতন?

পড়িয়া জলের কাছে মীন সে কেমন বাঁচে?

সে কথা জানিয়া সখি, কেন কর ছল?

আঁখি-পুটতট-ভরা সব জ্বালা ক্লান্তি হরা,

কালো সুগভীর বারি কেন টলমল?

এটা সখি কার ভুল? চোঁয়ায়ে মছয়া ফুল

লাবণ্যে আনিলি কেন মদিরার বান?

যদি তায় অবশেষে এ মক্ষী যায় গো ভেসে

কি দোষ তাহার? সেত অতি ক্ষুদ্রপ্রাণ!

মিছে দুষ প্রমত্ততা কেন তোর বাহুলতা

সাত পাকে জড়াইল এ তরুর গায়?

হাসির জ্যোছনারাশি বিশ্বময় আসে ভাসি’,

চকোর বাঁচিবে সখি, পালায়ে কোথায়?

মোহন প্রমত্তকর কথা কেন বাঁশীস্বর?—

মানস-কুরঙ্গ সেত অবোধ সরল,

যদি কটাক্ষের শর ঝরে পুনঃ তারপর,

কোথায় এড়াবে সে গো আঁখির গরল?

পায়ে পায়ে যদি লুটে’ কেবল গোলাপ ফুটে,

বুলবুল আঁখি মুদে বসিবে কি তপে?
রূপের অনল যদি জ্বলে শুধু নিরবধি,
পতঙ্গ কেমনে বাঁচে পরাণ না সঁপে?
মানবের গৃহে জাগি' এ সব কিসের লাগি?
মোহন সুষমা এত কিবা প্রয়োজন?
পদে পদে অপরাধ, নিতি ঘটে পরমাদ,
তবে কেন কুণ্ঠাহীন এত আয়োজন?

BANGLADARSHAN.COM

দু'য়ে এক

দুই হয়ে কিবা প্রয়োজন?

রাত্রিদিন ব্যবধান, বাঁধাবাঁধি সাবধান,
প্রচণ্ড প্রয়াসে শুধু আংশিক মিলন;
নয়নের বাতায়নে বসি শুধু দুই জনে
নিতি মিলিবার লাগি বাহু-প্রসারণ।
দুইটি খাঁচায় থাকি ছট্‌ছট দুটি পাখী,
শুধু ব্যর্থ ডাকাডাকি, চক্ষু-বিদারণ।
মাংস-অস্থি-পঞ্জরের রক্তহীন ভূধরের
গাত্রে প্রতিহত দুটি নদীর স্পন্দন,
দুই হয়ে কিবা প্রয়োজন?

এক হ'লে বাঁচে দুটি প্রাণ;—

দুই তৃষা, দুই জল, দাউ দাউ, টলমল
মরীচিকা জ্বল্ জ্বল্ সারা দিনমান,
ভেঙে বাধাবন্ধরাজি দুটি প্রাণ মিশে আজি
উছলি' উঠুক সুখে দীর্ঘিকার প্রায়,
ফুটাইয়া শতদল আত্মানন্দে ছল ছল,
তৃষা যেন তটসম তাহাতে হারায়,
আকর্ষণ ডুবিয়া তাহে মিলন-সঙ্গীত গাহে
পূর্ণ প্রেমানন্দে সর্ব তৃষা অবসান।
এক হ'লে বাঁচে দুটি প্রাণ।

সম্পূর্ণ পাওয়া

গগনে কোটি তারকা হয়ে' তোমার পানে চাহিয়া রই'
পরাণ ভরে' হেরি গো কোটি নয়নে।

অঙ্গে তব সুষমা দিতে ফুল-জীবন যাচিয়া লই,
তোমারি লাগি' রচিত্তে ফুল শয়নে।

অযুত নদী-লহরী হয়ে' লুটিয়া পড়ি তোমার পায়,
তোমাতে মম পরাণ লই ভরি' রে,
আলোক তাপ হইয়া শীতে শিহরি' দিই তোমার কায়,
নিদাঘে অনুলেপন হই শরীরে।

তোমারি শ্বাস, ব্যজন হ'তে বায়ু-জীবন মাগিয়া লই,
রোমাঞ্চন হই রে লাজ-ভঙ্গে,
ঘুমা'লে তুমি স্বপন হয়ে' ঘেরিয়া তোমা জাগিয়া রই,
আবেশ হয়ে' মুরছি রহি অঙ্গে।

মানব হয়ে' তোমারে পেয়ে তোমারে ঠিক লভি নি,
আমি যে চাহি তোমার প্রতি অণুটি,
বাসনা তাই, মরিয়া লভি তোমারে করি যোগিনী,
ভস্ম হ'য়ে ভূষিয়া সারা তনুটি।

BANGLADARSHAN.COM

ভূষণ

চেয়েছিলে ভূষণ প্রিয়ে, ভূষণ সব সঙ্গ আছে,
এখন সব পরিয়ে দিলে তবে আমার প্রাণটা বাঁচে।
আজকে বুকের রক্ত দিয়ে
আলতা দিব পরাইয়ে,
আদরে আজ দুলিয়ে দিব চুমার নোলক নাকের কাছে।
রচিব হার একটি করে,
মেখলাটি, অন্যে পরে,
যাহার লাগি ব্থায় এ দাস দোকান দোকান ঘুরিয়াছে।
পায়ে দিব হিয়ার নুপুর,
বাজবে কিবা ঝুমুর ঝুমুর,
ভূষণ পরে' দেখবে বয়ান আমার দুটি নয়ান-কাচে।

BANGLADARSHAN.COM

সমস্যা

তোমায় কোথা ভূষণ দিব, সুন্দরি?

অঙ্গলতা গন্ধ-শোভায় আছেই সদা মঞ্জুরি।

আলতা কোথা পরবে তুমি?

ধরণী যে, চরণ চুমি'

ভরে' উঠে অশোকদলে, ভ্রমর ছুটে গুঞ্জরি।

তোমায় কোথা ভূষণ দিব সুন্দরি?

তাম্বুলেতে কাজ কি তব?—অধর তব গভীর লাল;

অঙ্গরাগ মাখবে কোথা?—ফোটা কমল তোমার গাল;

স্বর্ণ লাজে হবেই মাটি,

হোক না কাঁচা, হোক না খাঁটা,

কাঁকণ সে যে মলিন হয়ে' কাঁদবে দিবা শর্করী।

তোমায় কোথা ভূষণ দিব সুন্দরি?

কাজল তুমি পরবে কোথা, সেকি তোমায় সাজবে ভাল?

কাজল হ'তে উজল তারা, যুগল ভুরু অনেক কালো!

তোমার অমন চিকন চূলে,

কর্বে কি আর হীরের ফুলে?

নারীর ভূষণ পরবে কি আর মায়াবনের অঙ্গরি!

তোমায় কোথা ভূষণ দিব সুন্দরি?

BANGLADARSHAN.COM

প্রেমের স্মৃতি

কিশোর কালের প্রেমের স্মৃতি লুপ্ত হয়ে'ও লুপ্ত নয়,
জেগে উঠে যখন তখন, হিয়ার মাঝে সুপ্ত রয়।

বাঁশ বনটির ফাঁকে ফাঁকে,

পায়রা গুলোর ঝাঁকে ঝাঁকে,

পল্লীপথের বাঁকে বাঁকে ফুলবাগানের মধ্যখানে,

ফল পাড়া আর জল সৈঁচাতে সে প্রেম বুকে সদ্য আনে।

কিশোর কালের প্রেমের স্মৃতি লুপ্ত হয়ে'ও লুপ্ত নয়,

লতায় পাতায়, পাড়ার পথের যথায় তথায় গুপ্ত রয়।

সাঁজ পূজনার শাঁখের ডাকে,

বিকাল বেলায় কলস-কাঁখে,

পল্লীবালার উজল আঁখে, দিঘীর বাঁধা ঘাটটি'পরে,

ছুটাছুটি খেলাধূলায় পাড়ার মাঠের বাটটি ভরে।'

শিউলি-ছোপা কাপড়ে আর হোলির দিনে রাস-বাড়ীতে,

পাথর-পূজার পৌরহিত্যে, শিশু-পাঠের মাষ্টারিতে,

তুলসীতলার দীপ জ্বালাতে,

সাঁঝের ভোরের জল ঢালাতে,

কিশোর কালের ফুল তলাতে, যে বীজ বুকে উপ্ত হয়,

অঙ্কুর তার জীবন ভরে' লুপ্ত হয়েও লুপ্ত নয়।

BANGLADARSHAN.COM

বিফল আয়োজন

আজিকে হয়েছে ভগ্ন শূন্য, পূর্ণ কলস দুটি;
দুয়ারের পাশে কদলীকাণ্ড শুকায়ে পড়েছে লুটি।

এলেনা দেবতা মন্দিরমাঝে,

সব আয়োজন গেল বৃথা কাজে,

মঞ্জুরী ফুল মন্মর-শ্বাসে বালসি' পড়েছে টুটি'।

চুয়াচন্দন কুঙ্কুমরস শুকায়ে হয়েছে ধূলি,

দহে, লো ধূপ পিয়াসে পিয়াসে হতাশ শ্বসন তুলি।

যৌবন দিনে মঙ্গল ক্ষণ,

ভাষায় ভূষায় শত আয়োজন

বিফল হয়েছে হে মোর দেবতা, শিথিল অর্ঘ্যমুঠি।

BANGLADARSHAN.COM

বিরহতপের শেষে

সে দিন বসন্তে যবে মদকল পিকরবে
কানন ফেলিল জাগি' মলয়ের শ্বাস,
রসাল মুকুল-মূলে, চম্পক বকুল ফুলে,
করীর কপোলে ছুটে মদিরা উচ্ছ্বাস;
সেদিন এলেনা বঁধু, সুগন্ধ পরাগ মধু
ঝরিয়া পড়িল উড়ি' ধরণীর বুকে,
বসন্তের বিষ্মাধরে, প্রকৃতির গণ্ড' পরে,
চুম্বন উঠিল ফুটি' অশোকে কিংশুকে।
তোমারি আশায় নাথ, জাগিনু চাঁদিনীরাত,
করি অঙ্গে দোললীলা লাভণ্যের ফাগে,
পরীয়া রতন টীপ, যতনে জ্বালিয়া দীপ,
অধর করিনু রাঙ্গা তাম্বুলের রাগে।
কপোলে গোলাপী ভাতি, কুসুম-শয়ন পাতি
রাখিনু মালিকা গাঁথি কাঁচলী আঁচলে,
পর্ণপুষ্পভারনতা যেন পল্লবিনী লতা,
তরু-বাহু হ'তে খসি' পড়িয়া ভূতলে।
যৌবনের তট টুটি' লাভণ্য পড়িছে ছুটি,
তনু রোমাঞ্চিত স্ফুট কদম্বের প্রায়,
সে দিন এলেনা প্রিয়, সব কান্তি কমনীয়
জ্বলন্ত গরল হয়ে দহিল আমায়।
সহসা আসিবে যবে,— দন্ধ করি' মনোভাবে
তখন হরের কোপ দহেছে কানন;
শুষ্ক পত্র মরমরে প্রখর তপন-করে,
ঝলসি মলিন শীর্ণ ধারার আনন।
অশ্রুসিক্ত ছিন্নবাস, ধূসর চিকুর-রাশ
উড়ে যেন গৃধিনীর হেয় পক্ষজাল;
ধূ ধূ বেলা বালুকায় নিদাঘ তটিনী প্রায়,
নাহি রস কান্তি, সার করোটি-কঙ্কাল।

তোমার দরশ লাগি' বিরহ-যামিনী জাগি'
মলিন কোটরগত অরণ্য নয়ন,
নাহি ভূষা নাহি রূপ, যেন দন্ধপ্রায় ধূপ,
অনশনে তনু ক্ষীণ, ভূতলে শয়ন।
সহসা আসিলে বঁধু, নাহি সুধা নাহি মধু,
নাহি কোনো আয়োজন ভাষায় ভূষণে;
গৃহে নাহি দীপ জ্বালা, গাঁথা নাহি বনমালা,
নাই লাবণ্যের ডালা, বরিব কেমনে?
বিরহ-তপের শেষ, এস এস হৃদয়েশ,
এস নীলকণ্ঠ মোর মানস-মোহন।
অনলে দহিলে প্রভু, তাই ভস্মমাখা, তবু
তার মাঝে আছে হৃদি-হেম-সিংহাসন।

BANGLADARSHAN.COM

কুণ্ঠিতা

তুমি জ্ঞানী গুণবান;

তব দাসী হ'তে নাহি বোধ বল-তাই কাঁদে শুধু প্রাণ।
অমি বুঝিনাক তোমার গরিমা, বুঝিনে তোমার ভাষা,
কথার দৈন্যে বুঝা'তে পারি না হৃদয়ের ভালবাসা।
তোমার যা প্রিয় প্রাণের সাধনা-মোর তা' অন্ধকার,
কি কথা শুধা'লে, কি কথা যে বলি, অর্থ পাওনা তার।
কৃপার নেত্রে চেয়ে চেয়ে যবে ললাটে বুলাও কর,
লজ্জায় আর সঙ্কোচে মোর কুণ্ঠিত অন্তর!

আমি এ অবোধ নারী,-

তোমার চরণে লুটে পড়া ছাড়া আর কি করিতে পারি?

তুমি হে কর্মবীর;-

উন্নত বপু, বিশাল উরস-শান্ত, সুদূর ধীর;
ক্ষুধিতে রেখেছ যোগায়ে অন্ন, তাপিতে ছত্র ধরে';
হে ত্যাগি! কতই লাঞ্ছনা তুমি সয়েছ আমার তরে;
হৃদয়-শোণিতে জল করে' তুমি রাখিয়াছ সংসার,
ঝঞ্ঝাৎক্ষুন্ন তটিনীবক্ষে অটল কর্ণধার।

বুদ্ধির দোষে জঞ্জালজাল যতই জড়িয়ে তুলি',
নিশিদিন জাগি' হাসিমুখে তুমি একে একে দাও খুলি';

আমি এ অবলা নারী,

তোমার চরণে দাসী হওয়া ছাড়া কি আর করিতে পারি?

তুমি যবে গাও গান,

আমি শুধু শুনি, বুঝিনাক তা'র রস-তান-লয়মান।

কত দূর হ'তে শ্রোতা চলে' আসে আমার কুটীরদ্বারে,
মুগ্ধ হৃদয়ে কতই অর্ঘ্য বহি' আনে ভারে ভারে!

তোমার হিয়ার কতই নিকট হৃদিগুলি লও জিনি,

আমার মাথায় যে মাণিক জ্বলে, আমিই তাহা না চিনি;

মোর নাম ধরে' কত গান গাও, আমি তাহা নাহি বুঝি,

প্রাণের গরবে, নয়নের জলে, আপনা না পাই খুঁজি।

আমি এ অবোধ নারী,
নীরবে চরণ-চুম্বন ছাড়া কি আর করিতে পারি?

তুমি ভালবাস কত!

এক কণা পেলে ভরে' যায় প্রাণ, ঢালো বর্ষার মত।
রোগের শিয়রে অরুণ নয়নে জাগিয়াছ সারা রাত্তি,
পালকে আমার আচ্ছাদি, সবই নিয়েছ বক্ষ পাতি,
অতি করুণায় দিয়াছ লজ্জা, সজ্জা করি না তাই,
আপন দীনতা হীনতা স্মরিয়া কুণ্ঠায় মরে' যাই।
লোহার আঘাত সহিয়া অঙ্গে বুলালে স্বর্ণ কর,
প্রতিদান দিতে ক্ষণেকের তরে দাওনিক অবসর!

আমি দীনহীনা নারী,-

কেশ দিয়ে তব পদধূলি মুছা ছাড়া কি করিতে পারি?

BANGLADARSHAN.COM

তোমার প্রভাব

এ কুরূপে এ কুৎসিতে, হে সুন্দরি, করেছ সুন্দর
অঙ্গে অঙ্গে ছুটাইয়া লাবণ্যের আনন্দ-নির্ব্বার।
হরষে, পরশে তব সাজায়েছ হিরণ আলোকে,
অনুরাগ-জোছনায় রক্ত চুম্বে, পরীর পালকে
শোভিয়াছি পদুকোষে রেণুমাখা ভ্রমরের প্রায়,
ফুল্লরক্ত গণ্ড'পরে কালো আঁখি যেমন মানায়।

হে কমলা, এ দরিদ্রে করিয়াছ রাজরাজেশ্বর,
তোমার অঞ্চল হ'তে স্বর্ণশস্য ঝরে নিরন্তর।
ভিখারীরে শিখায়েছ রাজপদে তুচ্ছ গণিবারে,
উদার করেছ চিত্ত, তৃপ্তি দেছ-বিত্ত যা' না পারে।
ঢালিছ প্রবাল হেম মুক্তা হীরে,-অশ্রু হাসে ভাষে,
এ কুটীরে কোথা রাখি? বিব্রত করিলে সখি দাসে!

তপস্তুষ্টা বাণী মোর, এ মূর্খে করেিয়াছ কবি,
মূর্ত্তি ধরি গৃহকুঞ্জে আসিয়াছ কবিতার ছবি।
গুঞ্জরি' উঠিল প্রাণ, শিখাইলে প্রেমের গৌরব,
কল্পলতা! ঢালিতেছ অফুরন্ত কাব্যের বৈভব।
বিশ্বেরে দেখালে তুমি নবপ্রাতে নবীন আলোকে,
মঞ্জীরের তালে তালে ছন্দ নাচে আপন পুলকে।

হে নির্মলা পূতশীলা, এ পঙ্কিলে করেছ নির্মল;
প্রসন্ন সংযত ধীরে করি' মোর যা ছিল চপল।
শঙ্খস্বনে সন্ধ্যাদীপে, তব শুভ কঙ্কণ-নিরুণে
পুণ্যের উত্থান হলো অন্ধগৃহে কল্যাণের সনে।
পবিত্র মহিমাভরা জ্যোতির্ম্ময় তোমার নয়ন,
প্রতি পদক্ষেপে মোর সাথে থাকি করিছে শাসন।

প্রবঞ্চিতা

কা'দের প্রাণের অর্ঘ্যে সেজে,
ওগো রাজার নন্দিনি,
রূপ দেখে আর মিষ্ট কথায়
হ'লে শঠের বন্দিনী?
যা'তে তাহার মন ভুলালে,
জান কি কোন রাজ-দুলালে
হৃদ-রুধিরে পাঠাল তা' তোমার চরণ-রঞ্জনে?
কোন নৃপতি ছদ্মবেশে
গড়ল নূপুর হেথায় এসে?
কারিগরের নামটি বাজে তাহার মধুর শিঞ্জনে!
সূক্ষ্ম বুকের স্নায়ু দিয়ে,
বসন দিল বিরচিয়ে
কোন যুবরাজ সঙ্গোপনে নাম লিখিল অঞ্চলে?
তোমার বাগে মালীর কাজে,
তরণ কবি ছদ্ম সাজে
প্রণয়-ফুলে গঁথে মালা গলায় দিল কৌশলে!
সে সব তুমি খোঁজ নিলে না
ওগো রাজার নন্দিনি,
প্রণয়-জন ফেলে, হ'লে
অপ্রেমিকের বন্দিনী!

BANGLADARSHAN.COM

ঘাটে

সখি-গুরুজনে গিয়ে ব'লো,
অভাগী রাধার গায়ে বড় জ্বালা, তাই সে ঘাটেতে র'লো।
পাখী ফিরে নীড়ে ঐ ঝাঁকে ঝাঁকে,
উঠিয়াছে চাঁদ তমালের ফাঁকে,
গৃহে গৃহে দীপ করে টিপ টিপ যদিও সন্ধ্যা হ'লো,
যমুনার জলে আজি র'লো রাধা গুরুজনে গিয়ে ব'লো।

সখি-এখন কি ফিরা যায়?
পথ নির্জর্ন, ফিরেছে গোধন ধূলি উড়াইয়া পায়।
কেহ নাই পথে ঘাটে নদীতীরে,
কাজে যারা ছিল গেছে তারা ফিরে,
পাটনীও খেয়া করেছে বন্ধু,—ছাড়ি এত সুবিধায়,
ছাড়ি জনহীন সাঁঝের যমুনা, এখন কি ফিরা যায়?

সখি-কেন কৌতুক হাসি?
শুনি'ছ না কাছে কদমতলাতে ঘন ঘন বাজে বাঁশী?
ঘাটের কাজটি তোমাদের মত
আমার ত সখি সোজা নহে অত,
ছাড়াতে যে হবে,—চূলে আর হারে গলায় লেগেছে ফাঁসি,
কলস ভরা কি হয় তাড়াতাড়ি? কেন কৌতুক-হাসি?

সখি-বড় জালা দেহময়।
ব'লো গুরুজনে আজিকে রাধার কি জানি কিই বা হয়।
চাহিয়া চাহিয়া নীপতরু পানে
ভরি' লয়ে প্রাণ মুরলীর তানে,
একগলা জলে আছি সখি, বাকী একটু বই ত নয়,
ব'লো ফিরে এসে, গৃহে গুরুজন বেশী কিছু যদি কয়।

মথুরার দূত

বিদায়, চন্দ্রাননে!

এসেছে আজিকে মথুরার দূত আমার বৃন্দাবনে।
সঙ্গ আজিকে বাঁশরীর গান, প্রেম অভিনয় হ'ল অবসান,
কত অভিসার মান অভিমান উচ্ছ্বল রসবেগ।
যদিও যমুনা ভরা টলমল, নীপনিকুঞ্জ স্ফুট চঞ্চল,
ময়ূর ময়ূরী রস ঢল ঢল, গুরু গুরু ডাকে মেঘ,
তবু হয় যেতে হবে,
বারতা বহিয়া মথুরার দূত দুয়ারে এসেছে যবে!

ব'লো সে রাখালগণে,

এসেছে নিষ্ঠুর মথুরার দূত কালার কুঞ্জবনে।
জলকেলি শেষ বাঁপায়ে বাঁপায়ে কালীদহ জলে দু'কূল কাঁপায়ে,
বনমালা পরি' বনফল খেয়ে আদরে বক্ষেধরা,
রহিল গোপন সজল নয়ান, ফুলের দোলনা ভূতলে শয়ান,
র'লো রাসদল ঝুলনের স্মৃতি মানস চক্ষে ভরা।

মিছে আর মায়াডোর,

ভাসালাম আজি যমুনার জলে সাধের বাঁশরী মোর।

ব'লো সে যশোদা মায়,

আজিকে তোমার আদুরে দুলাল বাঁধন কাটিতে চায়।'
কাজ নাই আর ক্ষীর সর ননী, র'লো শিখিচূড়া রহিল পাঁচনী,
আঁচলের তার বাঁধন টুটিতে আঁখি ফাটে, বুক চিরে।
বলো সখিগণে কানু গেছে চলে', কলস ভরিয়া যমুনার জলে
নির্ভয়ে তারা নিরাপদে এবে জল লয়ে যেন ফিরে,

মিছে ডাকো বারে বারে,

এসেছে আজিকে মথুরার দূত কানুর হৃদয়-দ্বারে।

কেমনে হেথায় রহি,

মথুরার দূত এসেছে যখন কঠোর বারতা বহি'?
পিতামাতা কাঁদে পাষণ বক্ষে, নাহিক নিদ্রা প্রজার চক্ষে,

ডাকে পুণ্যের পরাজয়, গ্লানি, নিরীহের আঁখিলোর।
বাজিছে ডঙ্কা কর্মতোরণে, ডাকিছে সত্য বিষাণ বাদনে,
ভাঙিতে হয়েছে মোহের স্বপন,—ফাগের রঙ্গীন ঘোর।
মিছে আর আঁখিজল,
মথুরার দূত করিয়া দিয়াছে অন্তর টলমল।

BANGLADARSHAN.COM

অন্ধকার বৃন্দাবন

নন্দপুর-চন্দ্র বিনা বৃন্দাবন অন্ধকার।

বহে না চল মন্দানিল লুটিয়া ফুল-গন্ধভার।

জ্বলে না গৃহে সন্ধ্যা-দীপ,

ফুটে না বনে কুন্দ নীপ,

ছুটে না কলকণ্ঠ-সুধা পাপিয়া-পিক-চন্দনার।

নন্দপুর-চন্দ্র বিনা বৃন্দাবন অন্ধকার।

হেঁয় না তৃণ গোধনগুলি,

ছুটিছে মাঠে পুচ্ছ তুলি,

করে না রাধাকৃষ্ণ লয়ে' সারিকা শুক দ্বন্দ্ব আর;

সজল ঢল আয়ত আঁধি,

পিয়াল-ফুল-পরাগ মাধি'

ঘুরিছে খুঁজি, লেহন করে মৃগ পদারবিন্দ কার?

নন্দপুর-চন্দ্র বিনা বৃন্দাবন অন্ধকার।

যমূর আর মেলিয়া পাখা,

করে না আলো তমাল শাখা,

কুসুমকলি ফুটে না, অলি পিয়ে না মকরন্দ তার।

যায় না চুরি নবনী ক্ষীর

বলিয়া, ফেলে অশ্রুণীরে,

করে না দধিমহু গোপী নাচায়ে কটি, চন্দ্রহার।

নন্দপুর-চন্দ্র বিনা বৃন্দাবন অন্ধকার।

সলিল-কেলি-ফেনিল জলে

যমুনা আর নাহিক চলে,

পাটনী কাঁদি' তরণী বাঁধি' করেছে খেয়া বন্ধ তার।

কলসহার হারানো ছলে,

বধূরা মিছে যমুনা-জলে

করেনা সাঁজ শুনিয়া আজ বাঁশীটি শ্যামচন্দ্রমার।

নন্দপুর-চন্দ্র বিনা বৃন্দাবন অন্ধকার।

বাতাস শ্বাসে বেতসবন

গুমরি' মরে, হতাশ মন,
কুঞ্জ নাহি ঝুলন দোল, মধু মিলনানন্দ আর।
গোঠের ধূলি গায়েতে মাখি',
রাখাল ফেরে উদাস আঁখি',
ঘুরিছে ভুলে কুসুম তুলে, নাহি সে দেব বন্দনার।
নন্দপুর-ইন্দ্র বিনা বৃন্দাবন অন্ধকার।
যশোদা আজি মলিনা দীনা,
লুটায় ভূমে সংজ্ঞাহীনা,
রোদনে আঁখি অন্ধ হ'ল, তুলে না মুখ নন্দ আর।
কীচকবনে বাজে না বাঁশী,
নাহিক গান, নাহিক হাসি,
নবনারীর কণ্ঠে আজি দুলে না প্রেমানন্দ-হার।
নন্দপুর-চন্দ্র বিনা বৃন্দাবন অন্ধকার।

BANGLADARSHAN.COM

রাখালরাজ

অবোধ কানু, কার মায়াতে ভুলে,
গোকুল ছেড়ে চলে' গেলি ভাই?
সেথায় কেবল অনেক হাতী ঘোড়া,
তোর ত সেথা খেলার সাথী নাই!
কোথায় সেথা দুর্ঝাভরা গোষ্ঠ,
রাখালদলে খেলার হেন জোট,
ননীর মত নরম সাদা দেহ—
কোথায় সেথা দুক্ষে ভরা গাই?
রাখালরাজা, রাজ্য তোর এ ফেলে,
কেমন করে চলে' গেলি ভাই?
ময়ূর-নাচা এমন পাখী-ডাকা
হরিণ-চরা কোথায় সেথা বন?
মাটি-ছোঁয়া কোথায় তরুশাখা
বুলবি কোথা, দুলবি সারাক্ষণ?
কোথায় সেথা ফুলের ছড়াছড়ি,
কোথায় দিবি সদাই গড়াগড়ি?
গুঁজতে কানে কোথায় পাবি ফুল,
বনমালা পর্তে সুশোভন?
ময়ূরনাচা এমন পাখীডাকা
হরিণচরা কোথায় সেথা বন?
ক্লান্তি হ'লে বসবি কোথা ভাই,
শীতল হেন কোথায় তরুছায়া?
কোথায় সেথা কালিন্দীরি নীরে
কলকলিয়ে সাঁতার কেটে যাওয়া?
সেথা গভীর কালীদহের জলে
ডুবতে পাবি আঁধার কালো তলে?
শুকাইতে গায়ের জলকণা
কোথায় সেথা মধুর মৃদু হাওয়া?

BANGLADARSHAN.COM

ক্লান্তি হ'লে বসবি কোথা ভাই,
কোথায় সেথা এমন তরুছায়া?

তুল্বে কেবা বেলের কাঁটা দিয়া
কুশের কাঁটা বিঁধলে রাঙ্গা পায়?
পড়লে খসে' নূপুর ধরা চূড়া,
আবার কেবা পরিয়ে দেবে তায়?
তমালতলে বসলে মেলি' পা'
বাছুর তব চাটবে না ত গা',
দুপুর রোদে ধেনুর পিছে ঘুরি
কাহার দেহে এলিয়ে দিবি গায়?
কে ক্ষুধা পেলে আনবে বনফল,
ঘামলে ওমুখ মুছিয়ে দিবে হায়?
তুমি যে ভাই দুষ্ট ছেলে বড়,
তারা কি স'বে তোমার আচরণ?

মাখন দধি চুরিই যদি কর,
তোমায় তারা বকবে অকারণ?
বাঁশীটি যদি বাজাও শ্যামরায়,
কাজ করা যে সবার হবে দায়,
রাগবে না ত তোমার বাঁশী শুনে
যদি না হয় পরাণ উচাটন?
স্নানের ঘাটে কলস যদি হর',
হাসবে কি গো তথায় বধূগণ?

রাজা হওয়া যদিই বড় সখ,
রাজা ত তোয় করেছিলাম মোরা;
মোরা ছিলাম মন্ত্রী পারিষদ,
গোধন, মৃগ,—ছিলই হাতী ঘোড়া।
উইয়ের টিপি সিংহাসন পরে'
পাতার তাজ মাথার পরে ধরে'

BANGLADARSHAN.COM

কঠে নিলি গুঞ্জাফল-মালা,
হস্বে নিলি রাঙা রাখীর ডোরা?
হেথায় ফেলি মহারাজের ভোগ,
কেমনে তুই থাকবি ননীচোরা?

BANGLADARSHAN.COM

মথুরার দ্বারে

চরণে মিনতি প্রহরি তোমার—তাড়ায়োনা রাজপথে,
মোরা তোমাদের রাজারে দেখিতে এসেছি গোকুল হ’তে।
ঘাম ঝরে গায়, ধূলামাখা পায়, পরণে মলিন বাস,
তাই বলে কিগো যাইতে পাবনা মোদের কানুর পাশ?
তুমিত জাননা প্রহরি তোমার রাজাটি মোদের কে,
এই ধূলিমাখা বুকে মাথা রেখে মানুষ হয়েছে সে!
সে আজ ভূপাল, আমরা গোয়াল,—কথা রাখ, পায়ে পড়ি;
দুটি কথা শোন পাগল বলিয়া দিওনাক দূর করি।

আমাদের কানু; তার বাড়ী যেতে তোর পায়ে সাধাসাধি!
চোখে আসে জল, মুখে আসে হাসি, তাইত হাসি কি কাঁদি!
দাঁড়াইয়া ঠায় দ্বারে ধূলাপায়, কানু শুনে যদি তাহা,
আঁখি ছল ছল করিবে তাহার, বুকে ব্যথা পাবে, আহা!
রাজার দণ্ড ধরেছে কানাই, ছেড়েছে মোহন বাঁশী,
সেই হ’তে তার বুঝি মুখভার, নাই খেলা ধূলা হাসি!
আহা সে যে হয় কতই কেঁদেছে কাতরে, মোদের ছাড়ি’—
—অমন করিয়া দিওনাক গালি, ঙ্গকুটি করোনা দ্বারি।

কালীদহ হ’তে এনেছি তুলিয়া তার লাগি শতদল,
যে গাছের তলে ঘুমাত দুপুরে—সে গাছের পাকা ফল,
শাঙলীর দুধে তুলিয়া নবনী, ধবলীর দুধে ক্ষীর,
এনেছি অশোক ফুলে মালা গাঁথি, যমুনার কালনীর।
এনেছি পাঁচনী আর শিখিচূড়া, কোঁচান রঙ্গীন ধড়া,
বাঁশবন খুঁজে এনেছি বাঁশরী, যতনে ছিদ্র করা।
আর আনিয়াছি গোটা গোকুলের আশীষ, চোখের জল,
ভাঙা বুক আর রাগা আঁখি,—দ্বারি, একবার গিয়ে বল।
বলিস্ তাহার রোপিত তরুটি আজি ফুলে আলোকরা,
কদমতলাতে আসিয়াছে জল—যমুনা দুকূলভরা।
যা ছিল মুকুল, এখন তা ফল, চারা—সে বেঁধেছে ঝাড়,

কেঁড়েভরা দুধ ঢালে যে আজিকে সাধের গাভীটি তার।
কোথা রবে তার রাজসভা, দ্বারি-মাথার মুকুট তার,
বুকে এসে সে যে পড়িবে ঝাঁপায়ে, শুনে যদি একবার,-
নয়ন রাঙিয়ে দিওনা তাড়ায়ে প্রহরী নিঠুর-হিয়া,
দিব ক্ষীর ননী বনফুল তোরে, একবার বল্ গিয়া।

BANGLADARSHAN.COM

“বৃন্দাবনং পরিত্যজ্য পাদমেকং ন গচ্ছামি”

ব্রজের গোপী, ব্রজের সখা, কাঁদছ কেন উদাস প্রাণে?
এ বৃন্দাবন ছেড়ে আমি যাইনি চলে' কোনো খানে।
ব্রজ আমার প্রাণের প্রিয়, তাইতে সারা ব্রজের দেহ,
ব্রজের অণু, পরমাণু, রক্ত আমার হলো গেহ।
ব্রজের বাটে, ব্রজের ঘাটে, ব্রজের গোষ্ঠে, মাঠের মাঝে,
লতায় পাতায়, শ্যামলতায়, আছি আমি নানান সাজে।
মিছে সবাই কাঁদছ কেন? সবায় ঘিরে রইছি আমি,
বৃন্দাবনং পরিত্যজ্য পাদমেকং ন গচ্ছামি।

বরণ আমার মিশে গেছে ব্রজের শ্যামল দূর্বাদলে,
শাঙন মেঘের মর্সমাঝে কালীদহের কালো জলে,
শিখিচূড়ায় সুশোভিত চিকুর মম আছে হেথা,
ময়ূরনাচা তমালবনে সংশয়ে চাও, সত্য সে তা।
রোমগুলি মোর কদমফুলে রহেছে ঐ শিহরিয়া।
গোপাঙ্গনার অঙ্গতটে আঘাতিতে আহুদিয়া,
দ্রবীভূত হৃদয় আমার যমুনাতে গেছে নামি',
বৃন্দাবনং পরিত্যজ্য পাদমেকং ন গচ্ছামি।

বেণুর বনে বাজে বাঁশী, চমকে উঠো, বুঝনাকি?
কালীদহের নীলোৎপলে দেখনিকি আমার আঁখি?
কৃষ্ণসারের চরণ-পাতে আমার ভাবি চাও যে পিছে,
আমার পায়ের শব্দ সে তা' একেবারে নয়ক মিছে।
বন্ধু-জীবে রক্ত অধর, কিসলয়ে নখরুচি,
পদাতলে চরণ দুলে,—কুন্দবনে হাস্য শুচি।
চিনি চিনি চিনতে নার', চমকে উঠে চাও যে থামি';
বৃন্দাবনং পরিত্যজ্য পাদমেকং ন গচ্ছামি।

পাটল অশোক পলাশবাগে মধুমাসের মধুর খেলা,
পরাগ রাগে হোলির ফাগে, উচিত আমায় চিনে ফেলা।
বকুল ডালে, বেতস বনে, বাদল বায়ে ঝুলন করি।
ব্যাকুল চোখে চেয়েও থাকো, যেন আমায় ফেল্লে ধরি।

দেখতে কেন পাওনা আমার রাসের লীলা মুকুলফুলে,
পূর্ণিমাতে তরলতায় ঢেউয়ে ঢেউয়ে দৌদুল দুলে?
পরশ আমার ব্রজের বায়ু ঘুরছে ত ঐ দিবাযামী,
বৃন্দাবনং পরিত্যজ্য পাদমেকং ন গচ্ছামি।

বৃন্দাবনে আমাতে আর রাখিনিক ভিন্ন ভেদ,
‘তৃপ্ত আমি, বঞ্চতি সে’—থাকবেনা এ রকম খেদ।
সকল যুগের সকল লোকের দেশ বিদেশান্তরের লাগি’,
ব্রজের ধূলায় কদমতলায়, হৃদয় গুলায়, আছি জাগি।
লুঠলে পরে ব্রজের রজে, নাইলে পরে ব্রজের ঘাটে,
আমায় মেখে ফিরবে সে যে, ভয় কি তাহার যমের হাটে?
মিছে কেন কাঁদছ সবে?—যায়নি ছেড়ে ব্রজস্বামী।
বৃন্দাবনং পরিত্যজ্য পাদমেকং ন গচ্ছামি।

BANGLADARSHAN.COM

জননী বঙ্গ

রচিল ধর্ম-প্রয়াগ-তীর্থ যার ভগবান পরমহংস,
বেদের বার্তা আনিল ফিরায়ে যার রায় সেন ঠাকুরবংশ।
বিদ্যা করুণা তেজের 'সাগর' ভরিল অঙ্ক দানের রত্নে,
বঙ্কিক যার রঞ্জিল পদ বুকের রুধিরে প্রাণের যত্নে।
যাহার চরণ জীবন মরণে শরণ, সে তুমি জননী বঙ্গ,
জ্ঞান-বিজ্ঞান-ললিতকলায় শোভিত অমল শ্যামল অঙ্গ।

ভূদেব রমেশ দীনবন্ধুর অর্ঘ্যে পদারবিন্দে দীপ্তি,
যার মধু হেম নবীন রজনী সুধাপানে ক্ষুধা করেছে তৃপ্তি;
গিরিশ দ্বিজেন সমাজধর্ম জাগাল আবার নটের দৃশ্যে,
ঋষি ব্রজেন্দ্র তত্ত্বজ্ঞানের ঘটদীপ তুলি' ধরিল বিশ্বে;
যাহার চরণ জীবন মরণে শরণ, সে তুমি জননী বঙ্গ,
জ্ঞান-বিজ্ঞান-ললিতকলায় শোভিত অমল শ্যামল অঙ্গ।

যার দানবীর রাসবিহারীর কণ্ঠে ধ্বনিত ন্যায়ের বিশ্ব,
মশীন তারক ব্রজ মণীন্দ্র বলির ধর্ম্মে হয়েছে নিঃস্ব,
আশতোষ আর হরিনাথ যার শোভিল বাণীর স্নেহের অঙ্ক,
নব সাধনার গুরু সুরেন্দ্র বাজাল বিশ্ব-নিনাদী শঙ্খ;
যাহার চরণ জীবন মরণে শরণ, সে তুমি জননী বঙ্গ,
জ্ঞান-বিজ্ঞান-ললিতকলায় শোভিত অমল শ্যামল অঙ্গ।

যার মহেন্দ্র গঙ্গাধরের ভৃঙ্গার জলে বাঁচিল সৃষ্টি,
হোতা প্রফুল্ল নব রসায়ন-হোমানলে করে হোবির বৃষ্টি
ধরে গুরুদাস পুণ্যচরিত সত্ত্ব-নিষ্ঠা শুভ্র ছত্র,
যোগী জগদীশ তড়িতাক্ষরে লিখিল যাহার বিজয়-পত্র
যাহার চরণ জীবন মরণে শরণ, সে তুমি জননী বঙ্গ,
জ্ঞান-বিজ্ঞান-ললিতকলায় শোভিত অমল শ্যামল অঙ্গ।

সত্ত্বরজের মিলনমন্ত্র ঘোষিল বিশ্বে বিবেকানন্দ,
দিগ্জয়ী কবি সিন্ধুর কূলে গায়িল আবার সামের ছন্দ,
পুত্র যাহার সত্যের লাগি বরিছে শীর্ষে অশনি-বর্ষ,

দেশের কর্মে, সেবার ধর্মে জনমে যা'দের ত্যাগের হর্ষ;
যাহার চরণে জীবন মরণে শরণ, সে তুমি জননী বঙ্গ,
জ্ঞান-বিজ্ঞান-ললিতকলায় শোভিত অমল শ্যামল অঙ্গ।

BANGLADARSHAN.COM

সাহিত্য-সম্রাট-রবীন্দ্রনাথ

হে সুন্দর! অতীন্দ্রিয় সৌন্দর্যের অশ্রান্ত বিকাশ!
লভেছি তোমার মাঝে অনন্তের মঙ্গল আভাস।
তোমার অমেয় শক্তি অত্র ভেদি ছুটেছে দ্যুলোকে,
তব রূপনীলাম্বরে আঁখি-পাখী ডুবিল আলোকে,
মুরছি পড়িল আত্মা তব জ্ঞান-সিন্ধু-সিকতায়,
প্রেমানন্দ-বন্যা মাঝে মর্ম্মতট লুকালো কোথায়!
সীমা নাই, কূল নাই, হে বিরাট, সব যাই ভুলে,
স্পন্দহীন, নিশিদিন, দাঁড়াইয়া তব পাদমূলে।

হে আনন্দ! একি হেরি আসিয়াছ কাননে কান্তারে,
প্রভাতের কলহাস্যে, কুসুমের সুষমা-সস্তারে,
তরঙ্গের চল লাস্যে, বিহঙ্গের সঙ্গীতের তানে,
প্রকৃতির রঞ্জে রঞ্জে, মেঘমন্ড্রে, ইন্দ্রধনু-প্রাণে।
হে মঙ্গল! আসিয়াছ শঙ্খস্বনে উটজ-প্রাপ্তনে,
লাজবর্ষে হাস্য হর্ষে স্বর্ণ শস্যে ভবনে ভবনে,
প্রীতি-ডোরে, আঁখি-লোরে, পূজামন্ত্রে কুঙ্কুম চন্দনে,
শিশুর দেয়ালা মাঝে, কাঙ্গালের করুণ ক্রন্দনে।

হে মোহন! এলে যদি এসো তবে আরো সন্নিহিতে,
ভিড়াও সোনার তরী অন্ধকার মম চিত্ততটে।
পরশমাণিক্যময় মরালের পক্ষপুটে বাহি,
দীপ্তির কেতন তুলি, দ্যুলোকের পুণ্যগান গাহি,
লক্ষকোটি ভক্তিস্রোত পাদপদ্মে পড়ুক ছুটিয়া,
ভৃঙ্গ হ'য়ে রেণু মাখি' পড়ি তাহে লুটিয়া লুটিয়া।
উঠুক মূর্ছনা নব প্রাণবীণে পাবন পরশে,
ডুবে ও তরণীতলে মনোহীন মরুক হরষে।

কতদূরে! কত উচ্ছে! হে রাজর্ষি! তবু কত প্রিয়,
আঁকড়ি' ধরিব বক্ষে প্রেমোন্মদে তব উত্তরীয়।
পূর্ণ ইন্দু! তব তব গোম্পদের বুক জাগে ছবি,

নীহারের বক্ষোমাঝে ধরা দাও, ওগো দীপ্ত রবি।
রথ হ'তে নেমে এসো, দাঁড়ায়ো না ইন্দ্রিয়-দুয়ারে,
অন্তরের অন্তঃপুরে চলে যেতে হবে একেবারে।
উজলি' কিরীটালোকে অক্ষকার প্রাণের কুটীর,
এসো রাজ-অধিরাজ! ভক্ত যে গো আকুল অধীর!

রাখাল-রাজের মত হৃদি-গোষ্ঠে বাজাও হে বেণু,
নিমায়ের মত প্রাণে নাচ, মাখি' প্রেমানন্দ-রেণু।
গুহকেরে কোল দাও রঘুপতি সম হেসে আসি।
জাহ্নবী সমান এসে ধুয়ে দাও পাপ-গ্লানি-রাশি।
খ্রীষ্ট সম এসে তুমি ডাকো তব চরণের তলে,
দুষ্ক-শুভ দৃষ্টি-দানে স্নাত করি, মুক্ত শিশুদলে।
কমণ্ডলু হ'তে ঢালো আশীর্বাদ-অমৃতের ধারা,
তোমা ঘেরি' নৃত্য করি ফুল্লচিত্তে হয়ে' আত্মহারা।

BANGLADARSHAN.COM

দ্বিজেন্দ্র স্মরণে

(গান)

ওগো দ্বিজরাজ, কোথা গেলে আজ? লুকাল জ্যোছনা-হাসি
রবির আলোক জাগেনা প্রাচীতে, শুধু যে আঁধার-রাশি।

এখনো নিশীথ রয়েছে যে বাকী,

চলেছে পেচক শির'পরে ডাকি',

কা'র পানে এবে চেয়ে রবে আঁখি-অশ্রুতে যায় ভাসি!

ওগো দ্বিজরাজ, কোথা গেলে আজ? লুকাল জ্যোছনা-হাসি

বিভূষিলে মায় বীরের বক্ষ-শোণিত-লোহিত-রাগে;

তব সঙ্গীত শ্রতিমূলে তাঁর কুণ্ডল হয়ে' জাগে।

গড়ি' মঞ্জীর কনক-জীবনে

পরালে বঙ্গভাষার চরণে,

তোমার কণ্ঠ-কম্বুর নাদে জাগিল বঙ্গবাসী।

ওগো দ্বিজরাজ, কোথা গেলে আজ? লুকাল জ্যোছনা-হাসি।

জাগায়ে' হাস্য মৃতকল্পের পাণ্ডুর ম্লান মুখে,

গহন কাননে ফুটালে কুসুম কাঁটার বোঁটার বুকো।

ফুটায়ে' কমল গরল-সায়রে,

বসালে বাণীরে তুমি তার' পরে,

ওগো নটবর, ফণীর ফণায় বাজালে মোহন বাঁশী।

ওগো দ্বিজরাজ, কোথা গেলে আজ? লুকাল জ্যোছনা-হাসি।

BANGLADARSHAN.COM

রোগশয্যায় কবি রজনীকান্ত

হে কিন্নর! কণ্ঠে কণ্ঠে জাগাইয়া সঙ্গীত-মাধুরী

কণ্ঠ তব আজিকে নীরব।

আজি ভিখারীর বেশে দাঁড়ায়েছ রাজরাজেশ্বর!

বিলাইয়া সকল বিভব।

সাজায়ে হীরক-হারে বিশ্বজনে, কঙ্কালের মালা

আজি তুমি পরিয়াছ গলে।

হাসিতে ভাসায়ে ধরা, আজি তুমি করিতে সিনান

নামিয়াছ নয়নের জলে।

সকল দংশন তুমি বুকে নেছ, করি' বিতরণ

মকরন্দ মধুর তরল।

সব সুখদুঃখ মথি' বিলাইয়া অমৃত সবারে

কণ্ঠে নেছ ভীষণ গরল।

এ বঙ্গকাননমাঝে তুমি ছিলে যে নম্র, মোহন,

শান্ত সৌম্য শ্যাম তরুণবর।

নঙাড়ি' মরম রক্ত ভক্তিরাজা কুসুমনিচয়

ফুটায়েছ কত মনোহর!

তোমাতে কোকিল গাহি' নিখিল করেছে মাতোয়ারা,

পাপিয়া গেয়েছে শতগান,

তোমার ছায়ায় আসি' লভিয়াছে শান্তির বিরাম

কতশত দাবদন্ধ প্রাণ।

আজি তব ভগ্ন শাখা, শুষ্ক পত্র, মূল হীনবল

অদৃষ্টের অশনি-আঘাতে,

শেষ বিন্দু বক্ষরক্ত তা'ও দিয়া তবু ফুটা'তেছ

ছোট ফুল গলিত শাখাতে।

কাঙাল এ বঙ্গমা'র হে সুকবি, বড় আদরের

তুমি দেব, কাঙ্গাল সন্তান।

কুটীর-প্রাঙ্গনে তাঁর পথে ঘাটে মালধঃবিতানে

ঘুরিতে গাহিয়া সদা গান।

BANGLADARSHAN.COM

আজিকে সহসা এলো পিতার আহ্বান দেশান্তরে
শুনে তুমি হয়েছ চঞ্চল।
কোন্ রাজসভাতলে সেথা তুমি হবে বরণীয়
ছাড়ি' গিয়া জননী-অঞ্চল।
আহা তবু মা'র প্রাণ! বক্ষে চাপি ধ'রে আছে তাই
অশ্রুমাখা নিবিড় বন্ধনে,
ছাড়াইতে বাহুপাশ চাহ তুমি প্রাণপাখী তব
উড়ে গেছে সুদূর নন্দনে।

হে মুক্ত সাধক, আজি দাঁড়ায়েছ উজ্জ্বল গৌরবে
সীমাহারা অনন্তের কূলে,
কলকল রাঙ্গাজল পদতলে আসে ছুটে ছুটে,
লুটেপুটে পড়ে ফুলে' ফুলে'।
একখানি তরী তাহে কূলে বাঁধা করে টলমল,
বসি তাহে একটা কাণ্ডারী।

অমৃতের দেশ হ'তে বার্তা বহি' আনে ক্ষণে ক্ষণে
উর্ষিগুলি সুদূরবিহারী।
ভক্তগুলি চারিপাশে, -দাঁড়াইয়া আছ তুমি কূলে
শিরে শিরে আশীষ বিতরি';
তা'রা আজি ফিরিবে না-উত্তরীয় বসন অঞ্চল
বক্ষে চাপি ধরেছে আঁকড়ি।

বিশ্বসনে ইন্দ্রিয়ের চেনাশুনা হইয়াছে শেষ,
জাগে শিরে স্বর্গের আলোক,
দিগন্তের পরপারে জাগিয়াছে সম্মুখে তোমার
মুক্তদ্বার বাঞ্ছিত দ্যুলোক।
রোগ-শোক-তাপক্ষীণ কৰ্ম্মক্লান্ত বাহুটি তোমার
উর্ধ্বপানে দেছ বাড়াইয়া,
নেমে আসে স্বর্গ হ'তে জ্যোতির্ময় বরাভয় কর
তাপিতেরে লইতে তুলিয়া।
উপল-ব্যথিত-গতি তব শান্ত জীবনতটিনী
খুঁজে ফিরে জুড়াবার ঠাই;

জোয়ারে উছলি' সিন্ধু আগাইয়া ঐ আসে ছুটে
বুকে করে' লইবারে তাই।

মরণে বলেছ সখা, স্কন্ধে তার দিয়া বাহুভর
ফিরিয়াছ গৃহে আপনার।

দুঃখ সে যে ভৃত্যসম আলো লয়ে' যায় আগেভাগে,-
বনপথ দুর্গম আঁধার।

তব ব্যথাতাপ সে যে কুসুমের ফুটার ব্যগ্রতা,
নির্ঝরের ছুটার প্রয়াস।

দেহের পিঞ্জর-দ্বারে দাঁড়াইয়া আত্মপাখী তব
মুক্তপ্রাণে হেরে নীলাকাশ।

তুমি 'প্রসাদে'র মত দাঁড়াইয়া জাহ্নবী-জীবনে
গাহিতেছ শেষের সঙ্গীত,

মোরা দাঁড়াইয়া কূলে হেরিতেছি চঞ্চল ব্যাকুল,
উর্ধ্বে তব অভয়-ইঙ্গিত।

BANGLADARSHAN.COM

হে তাপস! যজ্ঞে তব পূর্ণাহুতি আসিছে নিকটে,
ধূ ধূ করে' জ্বলিছে অনল!

করিব না অঙ্গহীন, কলুষিত-সংসার-কথায়
পুণ্যক্ষেত্রে ফেলি' আঁখিজল।

তব শরশয্যাপাশে আসিয়াছি আজি মহীয়ান্
লভিতে আশীষ, কোলাকুলি;

অমৃত দেশের বার্তা কহ কহ জানিয়াছ যাহা,
শিরে দাও তব পদধূলি।

করিয়া ধাতার পদে আপনারে সম্পূর্ণ অর্পণ
আর তুমি মানুষ ত নহ।

আজি এ মাহেন্দ্রক্ষণে শিষ্যে তব দীক্ষা-মন্ত্র দাও,
জপি গিয়ে তব নাম সহ।

বিজ্ঞানাচার্য্য প্রফুল্লচন্দ্রের প্রতি

(গান)

তোমারে গড়েছে বিধি তাঁর পাদ—
পদের পরিমলে,
রাখালরাজের গায়ের ধূলিতে,
নিমায়ের আঁখিজলে।
তোমার মাঝারে ধ্রুবের সাধনা
জনকের জ্ঞান-গরিমার কণা,
তার মাঝে দেব, মহামহিমায়
ভীষ্মের তেজ জ্বলে॥

হোমানল-পাশে গুরুকুলবাসে
কোন নৈমিষে পশি,
নিয়ে এলে জ্ঞান, হে সুধী মহান,
ঋষি চরণে বসি?
বিগত জনমে কোন ব্রজধামে
রাখালের দলে ছিলে কোন নামে?
ত্যাগের মন্ত্র শিখে এলে তুমি
কোন বোধিদ্রুমতলে?

BANGLADARSHAN.COM

অধ্যাপক বিনয়েন্দ্রনাথ সেনের পরলোক গমনে

(গান)

ওগো পুরোহিত, ফিরে এস এই
বাণীর দেউলতলে;
বেলা বহে' যায়, ধূপ দহে' যায়,
ঘৃত দীপ বৃথা জ্বলে।

না জাগিতে উষা তেয়াগি শয়ন
ভকত করেছে কুসুম চয়ন;
আশাপথ চাহি' অযুত নয়ন
অরণ্য আঁখির জলে॥

পিঙ্গল হলো হোমের অনল
হবির পিয়াসা বহি';

কমলের বনে ক্ষুধিত মরাল
ফেলে শ্বাস রহি' রহি'।
দু'করে কুসুম-চন্দন-জল,
দাঁড়িয়ে দু'ধারে সাধকের দল,
এত আয়োজন করো না বিফল,
একবার এস চলে' ॥

BANGLADARSHAN.COM

সাধক কবি নীলকণ্ঠের প্রতি

জনমেছ পল্লীভূমে, পল্লীকবি, পল্লীমা'র উল্লাসী দুলাল,
তোমার সে শিক্ষাভূমি ঐ পল্লীবন্দাবন। কদম্ব তমাল,
শাঙনের ঘনঘটা, পল্লীকুঞ্জ, স্ফুটপদ্ম শ্যাম সরোবর,
তোমা'রে করেছে কবি; কূজনগুঞ্জধ্বনি, নদীকলস্বর
শিখা'ল গাহিতে তোমা। নগরের জনসঙ্ঘে পাওনি' আসন,
রাজার সভায় বসি' অনুমতি মত বীণা করনি বাদন;
তবু তুমি শ্রেষ্ঠ কবি।-দেশবন্ধু, বঙ্গমা'র পরাণের ধন,
হৃদয়ের প্রতিবাসী, আড়ম্বরশূন্য কবি, একান্ত আপন।
যোগায়নি ভৃত্য তব নিত্য নিত্য কবিত্বের সামগ্রী-সস্তার;
তোমারি আঙিনাতলে চিরমুক্ত প্রকৃতির সুষমা-ভাণ্ডার।
নহ তুমি শিল্পী কবি,-অনুশীলনের ফল করনি সম্বল;
অকৃত্রিম বনফুল,-গীতি তব, ভাবমধু যাহে ঢলঢল।
দেশের বিপ্লব আর জাতিধর্মসমাজের উত্থান-পতনে,
তোমার কাব্যের রাজ্য অচঞ্চল, চমকেনি প্রতি ক্ষণে ক্ষণে।
জগতের মহাযজ্ঞে মহোৎসবে করনিক তুমি যোগদান;
একতারা হাতে বসি' নদীতীরে করিয়াছ হরিনাম গান।
মাননি' শাসননীতি, রীতি তব ছন্দঃশাস্ত্র অলঙ্কার ছাড়া;
আছে ভক্তি, আছে প্রাণ, লাভণ্য সে অনবদ্য, সর্বভূষাহার।
হিমাংশুর রাজকীগণসম নাহি অঙ্গে তার ভূষণ-সস্তার,
কাঙাল সে ভিখারীর প্রিয়াসম-আছে রূপ, সতীতেজ আর।
মহাসমিতির মাঝে গীতি তব শত কণ্ঠে হয় নি উদ্দীত;
নগরের নাট্যশালা-রঙ্গমঞ্চ তব কাব্যে হয়নি ধ্বনিত।
তবুও সঙ্গীত তব কোলাহলে পল্লীপ্রান্তে যায়নিক ডুবে,
যদিও সে গীত শুধু গোপীযন্ত্র বাশা আর 'গাব্গুবাগুবে';
পল্লীবাটে, মাঠে, ঘাটে, ইস্কুক্ষেত্রে, জেলেদের তালডিঙ্গি' পরে,
ওগো কণ্ঠ! কণ্ঠ তব শুনা যায় একগ্রাম হ'তে গ্রামান্তরে।
প্রেমিক সে সাড়া দেয় মাঠ হ'তে তব গানে প্রেমিকারে তার;
সন্ধ্যামুখে কৃষিজীবী ও গীত-সলিলে ধোয় কর্মরুক্মিভার।

সৰ্ব্বভীতিহৰা গীতি গাহি' পাহু জানায় সে গ্রামের প্রবেশ,
ভিখারী-সম্বল গান দূরিল হৃদয় হ'তে চিন্তা-চেষ্টা-লেশ।
ওগো কণ্ঠ, কণ্ঠ তুমি বঙ্গমা'র চিরমুক্ত সৰ্ব্ববাধাহারা-
সহজ সরল লঘু পরাণের ক্ষরে যাহে আনন্দের ধারা।
সমগ্র এ বঙ্গভূমে করিয়া রেখেছ তুমি চির বৃন্দাবন,
'কানু বিনা গীত নাই'-কণ্ঠে কণ্ঠে ফিরে ঘুরে নন্দের নন্দন।
নীলকণ্ঠ, কণ্ঠে তুমি ধরিয়াছ দুখতাপবেদনা-গরল,
আমাদের দিয়ে গেছ শুধু স্নিগ্ধ আনন্দের অমিয়া তরল।
হে বিশ্ব রাজার সভা-গায়ক মহান্ কবি, বন্দিহে চরণ,
তোমার অমর কণ্ঠে শুনি আমি এ বঙ্গের হিয়ার স্পন্দন।

BANGLADARSHAN.COM

শ্রীক্ষেত্রমঙ্গল

এ যে, মহামিলনের ক্ষেত্র,-
হৃদয়-কমল ফুটে উঠে হেথা বিকশয় জ্ঞান-নেত্র।
অসীমের সনে অসীম মিশেছে, চেতন মিশেছে জড়ে;
দেউল মিলেছে আকাশের গায় দেবতা বক্ষে ধরে।
সিন্ধু আকাশে হেথায় কেমন দিগন্তে কোলাকুলি!
দেবতা মিশিছে মানবের সহ সকলের আপনা ভুলি।
তপন নীরবে তেজোগৌরবে লহরে মিশিছে সুখে,
স্বরগ নামিয়া মরত উঠিয়া মিলিতেছে বুক বুক।
এ যে, মহামিলনের ক্ষেত্র,-
অনন্তে ছুটে পরাণ এখানে দিগন্তে ছুটে নেত্র।

এ যে গো প্রেমের রাজ্য,
মনে প্রাণে হেথা বড় মাখামাখি, মিলে অন্তর বাহ্য।
চারিদিক হ'তে ভকত-হৃদয়ে প্রেমের বন্যা ছুটে;
প্রেমের নৃপতি নিমায়ের হেথা চরণ হৃদয়ে ফুটে।
ধনী দীন হেথা নাহি ব্যবধান মিলিতেছে বুক বুক;
চঞ্চল দ্বিজ করে একত্রে হেথায় ভোজন সুখে।
সংসার হেথা প্রকৃতির সাথে প্রেমের মিলনে জুটে,
দেবতা নরের মধুর মিলনে আনন্দগান উঠে।

এ যে গো প্রেমের রাজ্য,
প্রেমের মিলনে উৎসব করে হেথা অন্তর বাহ্য।

হেথা নাই লাজবন্ধ;
নাহি হেথা ছল, শঠ অসরল, নাহি সঙ্কোচগন্ধ।
নহে কুণ্ঠিতা হিন্দু দয়িতা অবগুণ্ঠন ফেলি।
বিলাসী হেথায় রিক্ত-বসন, ভূষণ রেখেছে ঠেলি।
বৃদ্ধ হেথায় বালকের প্রায় ছুটিছে পুলকভরে,
যুবক এখানে মুদি'ছে নয়ন যুক্ত করিয়া করে;
ভক্ত এখানে মহাকীর্তনে নাচিছে আপনহারা,
ভক্তিতে হেথা লুটিয়া পড়েছে নাস্তিক ছিল যাঁরা।

হেথা নাই বাধা বন্ধ,
হেথা হৃদি শির নুয়ে পড়ে, নাহি মান-অপমান-গন্ধ

হেথা, সকল গর্ব চূর্ণ;
আপন নীচতা দীনতার জ্ঞানে অন্তর পরিপূর্ণ।
বিরাট বিশাল দেবালয় হেথা গগন ভেদিয়া চলে,
তাহার মধ্যে বিরাট পুরুষ মহামহিমায় জ্বলে।
উদাস উদার হেথা পারাবার ভাতিছে বিশ্বরূপ,
তাহার কেশরে চরণ রাখিয়া নাচিছে বিশ্বভূপ।
তপন এখানে নিজ অক্ষয় ভাণ্ডার দেছে খুলে,
বিরাটের চির বন্দনা-গান যায় অনন্তকূলে।

হেথা, সব অভিমান চূর্ণ;
তৃণ হ'তে হেথা নীচতর ভাবে অন্তর পরিপূর্ণ।

হেথা, এসরে হৃদয় মত্ত;
ক্ষণেকের তরে ছাড় তমঃ, ওরে লভ' সুবিমল সত্ত্ব।
সংসার-গ্লানি ধুয়ে মুছে এস, ছেড়ে এস কোলাহল,
ক্ষণেকের তরে নয়নে অশ্রু করুক হে ছলছল।
সব ঘৃণা ঘেষ অভিমান-লেশ সব বন্ধন ছিঁড়ি',
ক্ষণেকের তরে হেথা ছুটে এস পাষণ প্রাচীর চিরি।
কতজন হেথা ভক্ত হয়েছে, মুক্ত হয়েছে কত,
ক্ষণেকের তরে জাগিবে না ওরে মম প্রাণ তাপ-হত?

হেথা, এসরে হৃদয় মত্ত,
দিনেকের তরে ভোল' সব জ্বালা, লহ ভগবৎতত্ত্ব।

ওরে পাপ-তাপ-ক্ষুণ্ণ,
হৃদয়ের ভার নামাও হেথায় কর' নির্মল, শূন্য।
পীড়িত হেথায় হও নিরাময়, ক্ষুধিত ভোলরে ক্ষুধা,
হেথা শোকাতুর কর' শোক দূর, তৃষিত লহরে সুধা।
দীর্ঘ-হৃদয় লভরে শান্তি সান্ত্বনা লভ তাপী;
নিরাশ হৃদয় সরস হইবে, ভরসা লভিবে পাপী।
অতীত হেথায় চির মধুময় ভবিষ্য আলোকিত,
তনুভরা হেথা লোমহর্ষণে অন্তর পুলকিত।

ওরে পাপ-তাপ-ক্ষুণ্ণ,
লভরে শান্তি লভ সান্ত্বনা প্রাণে প্রাণে 'লভ পুণ্য।

জেগে যা'ক প্রাণ অন্ধ।

প্রেম-বন্যায় ভেসে যাও আজি ভাঙি' সব বাধাবন্ধ।
হেথা ধুলিরাজি গায়ে মাখো আজি, সেব' হেথাকার বায়ু;
এখানে সরসী-নীরে স্নান করি' বাড়ে স্বরগের আয়ু।
বালকের মত সিন্ধুর কূলে ছুটাছুটি কর খেলা,
আলোকের মত নাচিয়া বেড়াও সকালসন্ধ্যাবেলা।
পাগলের প্রায় কীর্তনে হেথা প্রেমে নেচে নেচে ফের',
জলধির' পরে উদিত মিহিরে বিভুর বিভূতি হের।

জেগে যাক প্রাণ বন্ধ।

হোক পাপ প্রাণ ফেটে শতখান, ঘুচে যাক দ্বিধা-দ্বন্দ্ব।

হের তুমি কত তুচ্ছ!

চারিদিকে শুধু বিরাট বিশাল অসীম বিপুল উচ্চ।
সিন্ধুর পানে, আকাশের পানে, অসীমের পানে চাও,
বিরাট উদার দেবালয়মূলে আপনা হারিয়ে যাও।
অনাদিপুরুষ-চরণের তলে চাও ভাই একবার,
নুয়ে যাক মাথা, মুদে যাক আঁখি, পড়ে যাক দেহ-ভার।
গভীরমর্ম-বাঁধন বিদারি' ডেকে ওঠো 'ভগবান';
ক্ষণেকের তরে অসীমের পানে ভেসে যাক সারা প্রাণ।

হের তুমি কত তুচ্ছ!

চারিদিকে কত বিশালের মাঝে তুমি শুধু তৃণগুচ্ছ!

মন্দির

ভুবনেশ্বর

শান্ত, তুঙ্গ, অবিচল হে দেবমন্দির,
জেগে আছ কতকাল তুলি' উচ্চশির!
তুমি বুঝি ছিলে আগে অনুচ্চ চঞ্চল
দেবতার ছত্রসম কোমল ধবল?
কোটি কোটি সন্ধ্যারতি মঙ্গল বাজনা,
পূজামন্ত্র, পুষ্পাঞ্জলি, পুণ্য আরাধনা,
তোমা ঘেরি' ঘেরে', লভি' শিলার আকার
গড়িয়া তুলেছে চূড়া, তোরণ, প্রাকার।
ধ্যানমগ্ন শান্ত শত যোগীর মহিমা
দেছে তোমা স্তব্ধ স্থির প্রশান্ত গরিমা।
ঘনীভূত ভক্তিপুঞ্জ অটল সুন্দর
করিয়াছে অবিচল সৌম্য মনোহর,
প্রাঙ্গণের তল তব যত হ'ল ক্ষয়,
লভিল ও পুণ্যদেহ তব উপচয়।

BANGLADARSHAN.COM

বিন্দুসরোবর

(ভুবনেশ্বর)

বিমল সাত্ত্বিকরসে অঙ্গ পুলকিত
সাধকের স্বেদবিন্দু হইয়া সঞ্চিওত,
কত যুগ যুগ হ'তে, ওগো সরোবর,
গড়িয়া তুলেছে তোমা বিরাট সুন্দর।
কোটি কোটি তীর্থযাত্রী করি' প্রণিপাত
খনিয়া তুলেছে তোমা, ওগো পুণ্যখান,
লক্ষ কোটি সাধকের ভক্তি-অশ্রুধারা,
করেছে তোমারে দীর্ঘ মিলিয়া তাহারা।
ভক্তের অমলরক্ত হৃদয় কোমল
প্রতিভাত হয়ে' জাগে রক্ত শতদল।
সতীর চিকুরস্পর্শে জেগেছে শৈবাল,
তার শুভ্র শঙ্খশ্রীতে ছুটেছে মরাল।
কোটি কোটি পুষ্পাঞ্জলি অর্ঘ্য নিবেদন
তব বক্ষে মন্দিরের করেছে সৃজন।

BANGLADARSHAN.COM

প্যালামৌ

ঐ যে গিরির পরে শোভিছে গিরি,
তমাল পিয়াল বনে রয়েছে ঘিরি;
উঠে যেন দিক্শেষে
ধোয়ার মতন ভেসে,
দ্যুলোক-দেশের পথে সাজান' সিঁড়ি।
স্বপন পুরীটি ঐ মায়ায় গড়া,
পালক-দোলানো শত পরীতে ভরা।
কাছে ভাবি যাও যত,
আরো দূর-দূর কত—
পথিক-লোলুপ-দিঠি-পাগল-করা।
যেখানে দু'কর দিয়ে বালুকা ছুঁড়ে'
জল পান করে লোক আঁজল পুরে।
যে নদী শুকানো মরা,
দেখিবে দুকূলভরা
পার হয়ে' কিছু পরে, আসিতে ঘুরে।
পাষণ চিরিয়া যথা উৎস ঝরে,
কোলবালা সাঁজে ভোরে সিনান করে;
কোমরে দু'হাত দিয়ে,
নারী ফেলে জল নিয়ে,
তিনটি কলস রাখি মাথার' পরে।
কালো পাথরের ছবি, নিখুত হেন,
কিশোরী চলিছে ছুটে, যমুনা যেন,
কে বলিবে ঝোপে ঝাড়ে,
উজান বহা'তে তারে,
বাঁশরীটি বারে বারে বাজিছে কেন?
আপনার বাহুবল, প্রাণের প্রভু,—
যুবতী এ দুটি সার ভুলে না কভু।
পতির বিধিবে যাহা,

BANGLADARSHIAN.COM

বুক পাতি' লয় তাহা,
প্রেম সে মাতাল বটে,-অটল তবু।

লতার বলয় পরে বালক বালা,
গলে শোভে শ্বেত নীল স্ফটিকমালা;
পাখীর পালক চুলে,
বনমালা গলে দুলে,
মহুয়ার ছায়াতলে নাট্যশালা।
মহুয়ার মদে চোখ ঘোরালো ভারি,
চলেছে কোলের যুবা ধনুকধারী।
বাঘেরে ধরিয়া কানে,
গুহা হ'তে টেনে আনে,
বালক ঝাঁপায়ে পড়ে পৃষ্ঠে তারি।

মৃগ চাহে চল চল আয়ত আঁখি,
পিয়াল ফুলের রেণু গায়েতে মাখি।
রঙ্গীন স্বপন আঁকা
ময়ূরী ছড়ায় পাখা,

এক সাথে ধরে তান লক্ষ পাখী।
মহুয়ার ফুলে সুরা ছুঁয়ায়ে পড়ে,
মাদলে শিরীষফুল বাদল ঝরে।
দাঁড়া'লে বকুলমূলে
পা দু'টি ডুবেগো ফুলে
নীপ চিরকামনায় শিহরি' মরে।

জ্যোছনা নদীর কূলে 'ফিনিক' ফুটে,
মাণিক জ্বলেগো বনরাণীর মুঠে।
এলায়ে চিকন চুল,
শ্রবণে রতন দুল,
জোনাকী-চুমকি দেওয়া আঁচল লুটে।
ঐ যে গিরির পরে শোভিছে গিরি,

ভাসা-ভাসা ধোঁয়া-ধোঁয়া, কুহেলি ঘিরি';
নাগবালিকার দেশে
নিয়ে যায় সখী এসে,
ঐ খানে আছে তার সুড়ং সিঁড়ি।

BANGLADARSHAN.COM

জলরাণী

মকরপতির পৃষ্ঠে বসিয়া দুলে
সলিলের মহারণী।
শতেক নদীর মিলনক্ষেত্রে তাঁর
বিরাজিত রাজধানী।
গ্রহ তারা লয়ে' গগন আরতি করে,
দশন হইতে হাসিলে মুকুতা ঝরে,
অধরের রাগে,—প্রবালের দ্বীপে ভরে
সাগরবক্ষখানি।
কথাটি कहিলে ভয়ে বিস্ময়ে চলে
স্রোতে স্রোতে কানাকানি।
নক্র করিছে বক্র করিয়া গ্রীবা
আদেশের অবধান।
দুটি করিকরে রচিত তোরণে বাজে
বৃহন জয়-গান।
শিরে তরণীর বিতান-প্রতান ওড়ে;
শীকরনিকর-জনিত-জড়িমা-ঘোরে,
চঞ্চলানিল অঞ্চল তার ভরে
কল কল তুলে তান।
মৃগালতন্তু-দুকূলের নাই তার
দুই কূলে অবসান।
কালো দীঘি তার কাজল দিয়াছে চোখে,
পরাণের কালিমায়।
চখাচখীগুলি বকাবকি করে শুধু—
'কে ভালো সাজাবে তায়?'
মৃদু কটাক্ষে শফরী লাফায়ে ছুটে;
ইন্দীবরের চামর,—চঞ্চুপুটে,
ঝটপট করি মরাল সারস জুটে,
সেবকের গরিমায়;

মীনগুলি সব বেড়িয়া বেড়িয়া কটি
রচে চারু মেখলায়।

জলকুঞ্জর কুম্ভ ভরিয়া আনে
তীর্থের জলে নিতি;
তিমিরাজ করে সলিলোচ্ছাসদানে
অভিষেক যথারীতি।
তপনের প্রতিবিম্ব-টিপ্টি ভালে,
অঙ্গরাগের মাধুরী ইন্দু ঢালে,
কণ্ঠে তাহার বলাকার মালা দুলে,
শৈবালের রচা সীথি;
নত করি' শির সিন্ধু-তুরগগুলি
গাহে বন্দনা-গীতি।

গিরিনদী রচে বুকের রক্তে তার
গৈরিক আলিপন।

ক্ষেত্র কানন কুসুমশস্যভার
করে পায় নিবেদন।

জননীর চুমা, ব্যজনের বায়ু, ছায়া,
লভেছে দিঠিতে সরল তরল কায়া,
চাহিয়া, বুলায়ে আঁখে অঞ্জন মায়া,
ঘুমে করে নিমগন।

স্নিগ্ধ চরণ-অরণ-বরণে ফুটে
মুগ্ধ কমলগণ।

অম্বুনিদাদী কষু একটি করে
ঘোষিছে বিজয়-বাণী;
কড়িগুঞ্জির মঞ্জুষা মণিভরা
ধরেছে অন্যপাণি।

উপকূলকূল লুটে লুটে পড়ে পায়,
তপ্ত ললাট তাপজ্বালা রাখে তায়,
তৃষা বুক চিরে ত্যাগের মত্ততায়

BANGLADARSHAN.COM

রক্ত দিয়াছে আনি।
বরাভয় লয়ে' জাগে শুভাশীষময়ী
শান্ত সলিল-রাণী।

BANGLADARSHAN.COM

মণিকারের প্রতি

ক্ষুদ্র হাতুড়িটি নিয়ে শুধু রাত্রিদিন,
দীপ জ্বালি' অন্ধ গৃহে ওগো মণিকার!
অক্লান্ত, অনন্যকর্মা, বিরামবিহীন,
সন্তর্পণে গড়িতেছ স্বর্ণ চন্দ্রহার!
ওগো শিল্পি! অন্তরের সর্ব্ব অনুরাগ,
প্রাণের যতনরাশি বিন্দু বিন্দু করি'
ঢালিতেছ, ক্ষুদে' ক্ষুদে' প্রতি ক্ষুদ্রভাগ,
জীবন সঞ্চিত অর্ঘ্য দি'ছ তায় ভরি।
একি শুধু তুচ্ছ তব দক্ষোদর লাগি?
একি শুধু ঘণ্য হয় অর্থমুষ্টিতরে?
উথলিয়া উঠে নাকি, ওগো অনুরাগি,
আর কোন তৃপ্তিরস হৃদিকুম্ভ ভরে'?
ভকতের অকৃত্রিম আনন্দের ধারা
সাধনায় করেনি কি তোমা আত্মহারা?

BANGLADARSHAN.COM

পাঁচ মিনিটের কর্তা

আজকে বসি ঠাকুরদাদার কেদারায়,
খোকা আমি গিয়াছি তা' ভুলিয়া;
হেঁয় না মাটা, দুলাছি তাই দু'টা পায়,
খবরের এ' কাগজখানা খুলিয়া।
চশমাটা তাঁর কানে দিছি লাগিয়া,
চোখ ছাড়িয়ে নাকের'পরে ঝোলে যে!
গুড়গুড়িটার নলটা নিছি বাগিয়ে,
লাগছেন কি ঠাকুরদাদা বলে'হে?
কে আছ হে, এস দেখি এ দিকে,
তামাক দিতে বলো না রামনিধিকে।

ঠাকুরকে আজ রাঁধতে বল খিঁচুড়ী,
ভাঁড়ার ঘরটা আজকে হবে এখানে;
হাঁড়ী করে' পান্তোয়া আর কচুরী
আন্তে কেহ যাক না চলে' দোকানে।
পিয়ন এসে রাখবে চিঠি টেবিলে,
টাকা কড়ি আমিই ল'ব লিখিয়া;
কি হ'বে আর দাঁড়িয়ে শুধু ভাবিলে,
আনো লাঠি শাল জোড়াটা দেখিয়া।
কোচম্যানকে বল গাড়ী যোড়া'তে,
গড়ের মাঠে যেতেই হ'বে বেড়াতে।

গোলমাল যে হচ্ছে বেজায় বাইরে,
বলছি থাম, নইলে যাব রাগিয়া।
আলমারীটার চাবিটা যে নাইরে,
বইগুলো সব দিতাম লালে দাগিয়া।
পাওনাদারে বলবে 'কিছু পা'বে না',
মেছুনীরে চুপড়ী বল নামাতে,
নাপিতকে আজ ফিরে যেতে দিবে না,
গোঁফ দাড়িটা হ'বেই মোরে কামা'তে!

হাঁ করে' যে হাস্ছো দেখি দুয়ারে,
দেখছো না যে বাবু তোমার চেয়ারে?

ঠাকুরদাদা যদিই পড়ে আসিয়া,
ভাবছ বুঝি, হ'ব বেকুব বোকাটি?
হাত বুলিয়ে বলবো আমি হাসিয়া—
“এ ঘরেতে গোল ক'রোনা খোকাটি।
একশোবার মক্সো কর লেখাটা,
মাধব খুড়ো আস্বে তোমা পড়া'তে;
আজকে যে চাই নামতা ঘোষা শেখাটা,
নইলে প্রহার আছে তোমার বরাতে!
দুপুর বেলা ডাকবে বাবার মামাকে,
পাকা চুল যে তুলতে হ'বে তোমাকে।

রোদে রোদে আজ হবে না বেড়ানো,
ঘরে বসে ছবিই আঁকো শেলেটে।
আম তলাতে হ'বে না আম কুড়ানো,
দুধ খাবে আজ ঢেলে চায়ের পেলেটে।
পাড়ার যত দুষ্ট ছেলে বকাটে
সঙ্গে মিশে' দুষ্টুমিটা শিখালে।
দুপুরবেলা বন্ধ র'বে কপাটে,
ছুটি পা'বে পড়লে বেলা বিকালে।
ছাদের' পরে উড়িয়ে দি'ব ঘুড়িটি,
সঙ্গে শুধু থাকবে দিদি বুড়িটি।”

BANGLADARSHAN.COM

অনুনয়

বোধন বাঁশী শুনে মাগো, মনটা আমার কেমন করে,
আসছে পূজা বলে আমার আনন্দ যে আর না ধরে!
বাবা আমার আসবে বাড়ী, জামা জুতা আনবে কত;
বুকটা আমার উঠছে নেচে, ভাবনা আমার জুটছে যত!
আজ হ'তে আর পড়বো না মা, মাষ্টারটা যাক্ মা চলে,
শরীর আমার নাইকো ভাল মিথ্যা করে পাঠাও বলে।
আজকে আমি লাফাই যদি 'আহ্লাদে' তাই বলো নাক';
মা তোমার আজ পায়ে পড়ি, গাল দিওনা কথা রাখ।

দূর্গা পূজার দালান ঘরে গড়ছে ঠাকুর কুমোর দাদা,
ময়লা হবে হোক মা কাপড়, মাখবো আমি তাহার কাদা!
অসুর আছে দাঁত খামুটে, সিংহ আছে কামড়ে তায়,
মা তুমি তা দেখ যদি, তোমার ভয়ত পায়ই পায়।
মুখে তাদের হাত দেই মা, ভয় পায় না আমার দেখে,
খুকী ভয়ে আর আসে না, দূরে থেকে পলায় ডেকে।
ভাত খেতে মা ভুলিই যদি, নিজে যদি তুমিই ডাক,
মা তোমার আজ পায়ে পড়ি, গাল দিও না কথা রাখ।

কুসুম ফুলে রং করা সেই কাপড়খানি জড়িয়ে গায়,
খুকী যদি আমার সঙ্গে ওপাড়াতে যেতেই চায়;
ননীর ঠাকুর কেমন হল, আসবে কবে ভুতোর দাদা,
তাদের বাড়ী আটচালাটি তালের পাতে হচ্ছে বাঁধা,-
এসব জেনে আসতে আমার দুপুর যদি বয়েই যায়,
খুঁজতে আসে রাখাল যদি, বাড়ীশুদ্ধ কেউ না পায়,
তুমি যদি তেলের বাটি গামছা হাতে চেয়েই থাক,
মা তোমার আজ পায়ে পড়ি, গাল দিওনা কথা রাখ।

পদ্ম আমি তুলবো আজি, করবো পথে ছড়াছড়ি,
আহ্লাদেতে কাশের ক্ষেতে আজকে দেব গড়াগড়ি;
সবুজ সবুজ চেউ খেলেছে ধানের ভুঁয়ে;-ছুটবো আমি,

লক্ষ দিয়ে দুড়মুড়িয়ে-নদীর জলে পড়বো নামি।
সানাই বাঁশী ঢোল কাঁশীতে লেগে যাবে বড়ই ধুম,
চক্ষু বুজে ভাববো শুয়ে, দুপুর রাতে নাইক' ঘুম।
নতুন কাপড় চাই মা আমার, পুরাণোতে হবে নাক',-
মা তোমার আজ পায়ে পড়ি, গাল দিও না কথা রাখ।

BANGLADARSHAN.COM

রাঙা চুড়ি

জনক আসিল বাড়ী, এনে দিল রাঙা চুড়ী
পূজাদিনে মেয়েটির তঁর,
পরি' তাই দুটি হাতে সে আজ পুলকে মাতে,
দেখায়ে বেড়ায় দ্বার দ্বার।
সানাই শুনিয়া কানে পূজার মগুপ পানে,
ছুটে যেতে পড়িল ধূলায়,
আঘাতে কাঁচের চুড়ী একেবারে হলো গুঁড়ি
চেয়ে দেখ, একি হয় হয়।
উঠিবেনা ধূলা ছাড়ি', ফিরিবেনা আর বাড়ী,
কাঁদে শুধু গলা ছাড়ি' দিয়া;
ভাঙা চুড়ি বার বার জোড়া দেয় কাঁদে আর,
চুল ছিঁড়ে লুটিয়া লুটিয়া।
পিতা আসি তুলে বুকে, চুমা দিয়া বলে মুখে,
'এতে আর কিসের কাঁদন?'
ভয়ে খুকী মুদে আঁখি, মা তাহার বলিবে কি?
নষ্ট হ'ল বহুমূল্য ধন!
পিতা কহে, 'মা আমার, কেন মিছে কাঁদ আর?
এনে দিব-ভারি এর দাম!'
থামিবে না কোনরূপে, তবু খুকী ফুঁপে ফুঁপে
কাঁদিয়া চলিবে অবিরাম।
কে বুঝিবে তার ব্যথা? কহে সবে বাজে কথা,
মূল্য শুধু ভাবে পয়সায়;
আকুল বাঞ্ছার যাহা যত ক্ষুদ্র হোক তাহা,
মিলিবে কি হাজার টাকায়?
সমগ্র বালিকা-প্রাণ চুড়ী সনে খান খান!
দাম দিবে কেবা বল তার?
এমন পূজার দিনে সেই রাঙা চুড়ী বিনে
তার যে গো সকলি আঁধার!

স্বদেশ-প্রত্যাগত জয়যুক্ত বান্ধবের প্রতি

(প্রথম মিলনদিনে)

হে বান্ধব, তোমাদের আজি পুণ্য মিলনের রাত্টি।
সে আজ বৎসর চারি, ব্রহ্মচারি, পুণ্যোজ্জ্বল-ভাতি
গিয়াছিলে গুরুকুলবাসে দূর সমুদ্রের পারে;
আচরি' স্বাধ্যায় তপ ঋষিদের দুয়ারে দুয়ারে,
আয়তনে আয়তনে, তীর্থে তীর্থে, আশ্রমে আশ্রমে,
ক্লান্তিহীন শ্রমে জ্ঞান সত্য-তত্ত্ব লভিয়াছ ক্রমে।
সমাপ্ত হয়েছে আজ দীর্ঘ তপ আচার্য্য-শুশ্রুষা,
অভিষিক্ত হে স্নাতক, পরি' আজি সংসারের ভূষা;
আলোকি' আঁধার গৃহ জ্ঞান-রত্ন-কিরীট-আলোকে,
প্রিয়ার সম্মুখে আজি দাঁড়াইলে পবিত্র পুলকে।

সে যেন অনেক দিন, মুকুলিত প্রথম যৌবন
শিহরি' উঠেছে শুধু, তুমি গেছ ছাড়িয়া তখন।
তার পর হ'তে দু'টি দ্বিখণ্ডিত মৃগালের প্রায়,
অবলম্বি সূত্রটুকু প্রাণরক্ষা আশায় আশায়।
মাঝখানে গিরিদরী, নদী, হ্রদ, তড়াগ, প্রান্তর,
বিরাট অজেয় সিন্ধু তরঙ্গিছে শুধু নিরন্তর।
বর্ষার দুর্যোগ রাতে চমকেছে মেঘ গরজনে,
যেন এই উর্মিলার প্রাণনাথ গিয়াছে কাননে।
মাধবী চাঁদিনী রাতে স্বপ্ন দেখে হ'য়েছে আতুর,
হারাই হারাই শুধু আশঙ্কায় পরাণ বিধুর।

যাচিয়াছে দেবতায় শুভ তব নিত্য সন্ধ্যাপ্রাতে
পূজা পুষ্পে দিনগণি পুণ্য পূত, শুভ্র শঙ্খ হাতে।
নিত্য গৃহ-কর্ম্মমাঝে ক্লান্তিহীনা তোমার কমলা,
তোমারি বরণডালা সাজায়েছে স্থির অচপলা।
মালা গাঁথিবার লাগি' কোন দিন তুলেনিক ফুল,
লিপির আশীষ বিনা পক্ষান্তেও বাঁধেনিক চুল।
আশাবন্ধ অবলম্বি কোনরূপে কাটায়েছে দিন,

রজনীগন্ধার সম বৃত্ত যার দীর্ঘ কম্পক্ষীণ।
ধূসর বসনাবৃত্তা মূর্তিমতী বিরহের ব্যথা,
করেছে যে তপ ব্রত, এত দিনে তার সার্থকতা।
নিত্য নিত্য লক্ষ পোত ভিড়িয়াছে তার চিত্ত-তটে,
আজিকার পুণ্য পোতে হে বাঞ্ছিত এসেছ নিকটে।

সংসার-আঙিনা তলে এস ভ্রাতঃ, ষোড়শ কলায়
অশ্রুহিম-ধৌত চাঁদ উদিয়া যে অমিয়া বিলায়।
ষোল মধু পূর্ণিমার ফুল্ল ফুলে যত্নে গাঁথা হার,
আজি বন্ধু লহ কণ্ঠে,—পদে নমে ষোড়শী তোমার।
হে বান্ধব, হে ধীমন, আজি অজ্ঞা বঙ্গ বালিকায়,
হেরিতে হইবে সুধি, তব কৃপানয়নের ছায়।
ভাষায়, ভূষণে, ভাবে, ভঙ্গিমায়, দীন আয়োজন,
ক্ষমিতে হইবে তার ক্রটিপূর্ণ প্রিয় বিনোদন।

মুন্সুয় ঘূতের দীপে ক্ষীণ আলো বনফুল হার,
ক্ষমিতে হইবে তার, সজ্জাদীন অর্ঘ্যের সম্ভার;
কুড়ায়ে লইতে হ'বে ভূমি হ'তে, যদি প'ড়ে যায়,
পুলক-আবেগ-কম্পে কর হ'তে, দিতে গিয়ে পায়।
প্রেম-ভক্তিরসে তার হৃদি-কুম্ভ পূর্ণ মুখে মুখে,
কোন কলা, শিক্ষা ছলা, চাতুর্যের ঠাই নাই বুকে।
শিখিনি বনের পাখী কোন বুলি সংসার-কাননে,
হৃদয়-কুলায়ে রাখি' ক্ষম তার স্বভাব কূজনে।

গুরু গুরু সুখে তার বেপথুতে দুরু দুরু বুক,
স্বেদে অভিষিক্ত তনু, রোমাঞ্চন অঙ্গে জাগরুক।
সে আজিকে প্রাবৃটের কম্পমান কদম্বের শাখা,
ধীরে দিও পদ-ভার, ওগো শিখি, ধীরে মেলো পাখা।
সঞ্চারণী পল্লবিনী লতা যদি তরু-বক্ষ পেয়ে,
লুটায় ঘুমায়ে পড়ে ক্ষম তারে কৃপানেত্রে চেয়ে।
মূরছিয়া পড়ে যদি তব জ্ঞানপারাবারতীরে,
জোয়ারে উছলি প্রেমে বক্ষে নিও তস্বী তটিনীরে।
প্রেমাবেশে আত্মহারা যদি নারে কহিবারে কথা,

নীরব বাগ্মিতা তা'র ক্ষমা ক'র স্তব্ধ কাতরতা।
আনন্দেতে রুদ্ধকণ্ঠ হৃদবক্ষে বৃদ্ধবৃদের সম,
প্রাসঙ্গিক অর্থহীন অর্ধস্মৃতি, বাণী তার ক্ষ'ম।
ক্ষমিও লুলিত দুটি মৃগালের ক্লান্তি অবসাদ,
তরঙ্গ-আহত আঁখি-উৎপলের শতেক প্রমাদ।
প্রেমের নীহার-স্নিগ্ধ হ'য়ে এস উষার অরণ,
কমলের মর্ম্মকোষ টুটাইতে প্রেমিক তরণ।
জগতের কর্ম্মক্ষেত্রে হও গিয়ে সহস্র-কিরণ,
দিগ্বিজয়ী দীপ্ততেজ জ্ঞানোজ্জ্বল মধ্যাহ্ন তপন।
হে বরেণ্য, হে তাপস, প্রেম তব পবিত্র সুন্দর,
ব্রহ্মচর্য্যপূত ধীর শাপমুক্ত অমল ভাস্বর।
পুলকাক্ষহবিঃ ঝরে, গার্হপত্যে আজি পূয্য যাগ,
গঙ্গা যমুনায় দৌহে রচিয়াছ গৃহের প্রয়াগ।
দাও আঁখিকুম্ভ হ'তে আনন্দের পুণ্য অশ্রুজল,
অভিষেক করি মোরা গৃহ বসি' লভি তীর্থফল।

BANGLADARSHAN.COM

শেফালি

অশুভ আমার পরশ-বাতাস-আমি গো দুখিনী শেফালি;
ছুঁয়োনা, আমি যে কানন-রাণীর সদ্যোবিধবা দুলালী।
কালি ছিল মোর বাসর-শয়ন,
প্রিয় সনে রাতে হইল মিলন,
কত রসাবেশ, কথা সে অশেষ, রাতি জাগি' কত হাসি বা!
প্রভাতের সনে ঝরিয়া পড়েছি, হয়েছি অভাগী বিধবা।
এখনো রয়েছে তাম্বুল-রাগ অধরের' পরে লাগিয়া,
এখনো দেহেতে জাগে রোমাঞ্চ প্রিয় সনে রাতি জাগিয়া;
স্বেদকণাগুলি রহিয়াছে গায়ে
নীহারের মত, যায়নি শুকায়ে,
এখনো প্রিয়ের চুম্বনরাগ শোণিতে রয়েছে জমিয়া।
তবু প্রাতে, বালা, হয়েছি বিধবা, পড়িয়াছি ধূলি চুমিয়া।
রসাবেশে যবে ভরপূর প্রাণ কালি কিসলয়-শয়নে,
ইন্দ্রধনুতে ভরেছে প্রাণ, তন্দ্রাজড়িমা নয়নে,
কালকীটে নাখে দংশিল শিরে,
ফুরাল সকলি, নীল তনু ধীরে,
বাসর-শয়নে বিধবা জগতে-হেন অভাগিনী নাই রে!
রৌদ্রচিতায় সহমৃত্যু হতে চলেছি, বালিকা, তাই রে।
ছুঁয়ো না বালিকা, আমিহে অভাগী, শুধু যে মরণ চাহি গো,
তোমার পুণ্যপুকুরের ব্রতে মোর তরে ঠাই নাই গো।
যদি ছুঁলে তবে লহ ডালা ভরে'
প্রিয় লাগি' বৃকে যে শোণিত ঝরে,
বসন রঙায়ে পরিও লভিবে জয় তবে নারী-জীবনে,
প্রেমবিজয়ের বারতা ঘোষিবে সে পীতকেতন ভূবনে।

সূর্যমণি

কুসুমের বনে উৎসব-লীলা শেষ হ'য়ে গেছে যবে,
আবেশ-আলসে লুলিত ঢলিয়া ঘুমায়ে পড়েছে সবে;

রুদ্র তাপসী সাজে

তুমি ফুটিয়াছ রক্তবসনা রৌদ্রের তেজোমাঝে।
তুমি যা'রে চাও মিলে না তাহায় উষার সরস সুখে,
তোমার বাসর-শয়ন রচিত নহে কিসলয়-বুকে;
চারি দিকে জ্বালি' অগ্নিকুণ্ড ভানুপানে মেলি' আঁখি,
প্রিয়ের লাগিয়া তোমার সাধনা বুঝিতে কি আছে বাকী?

তুমি জানিয়াছ সার—

স্মর বসন্তে সঙ্গে লইলে চরণ মিলেনা তাঁর।

ভয়ে কোন ফুল হ'ল পাণ্ডুর, আঁখি মুদি কেহ কাঁপে,
গরবিণী যত সোহাগিনী ফুল ঝলসি' পড়িছে তাপে;

তুমি দেবী, তুমি স্বাহা,

অগ্নির তেজ ধরিবে বক্ষে তুমি বিনা কেবা আহা?

বালারুণ হেরি' যে মেলে নয়ন, চাঁদের আলোকে যেবা,
তাদের মাঝারে মার্ভণ্ডের বেদীপাশে যাবে কেবা?

কেহ বা পূজেছে উষা দেবতায় সন্ধ্যারে কোন জনা,

উষা সন্ধ্যার সে আদি কারণে বল' কার উপাসনা?

তপোবল বিনা হয়,

কাহার সাহস তপনের প্রেম-চুম্বন কামনায়?

বিশ্ব-তাপন তপনে তুষিতে রক্তবসনা ধরা

স্বস্তি বাচন অর্ঘ্য রচনা তোমায় করেছে তুরা।

রাখিয়াছ ধূয়া ধরে'

মহাকীর্তনে সকলে যখন আলসে এলায়ে পড়ে।

হওনিক হারা সকলের মাঝে, গতানুগতিকা নও,

তেজোবৈভব স্বাধীন সত্তা গৌরবে বুকে বও।

কেদারী রাগিনী উঠেছ ফুটিয়া জটাবন্ধসাজে,

বিরাগের বাণী শুনিয়ে' অলস বিলাসীর সভামাঝে।
যবে সব ভূষাহারা,
ধরণী-সতীর সধবা-চিহ্ন তুমিই সিঁদূরধারা।

BANGLADARSHAN.COM

দিবাস্বপ্ন

বসিয়া প্রকোষ্ঠে মোর রাত্রি হ'লে ভোর,
মনোবিজ্ঞানের শুষ্ক নীরস কঠোর
অংশগুলি পড়িতেছি। ধরি' ক্ষীণ আলো
করোটি-প্রাকারতলে অন্ধকার কালো
গুহ্য কারাকক্ষ গুলি বেড়া'তেছি ঘুরি',
স্নায়ু মণ্ডলের শত খনি খাত খুঁড়ি',
খুঁজিতেছি মহারত্ন-সত্য-মহামণি-
পেশীপুঞ্জ আকুঞ্চন প্রসারণ গণি।
হেনকালে প্রজাপতি বাতায়ন দিয়া
পুঁথির চিত্রাঙ্ক' পরে বসিল উড়িয়া,
বিপুল বিন্যস্তচিত্তা একটি নিঃশ্বাসে
উড়ে গেল পতঙ্গের পাখার বাতাসে।
বাঁশরীতে বাজে কানে সাহানা রাগিনী;
নয়নে উঠিল জাগি' বাসন্তী যামিনী
ফুলফল-আলোময়ী। লাজ-বরষণে
বাজিল মঙ্গল শঙ্খ কল হরষণে,
উলু উলু কোলাহলে কঙ্কণ নিক্কণে,
চন্দন-কস্তুরী-ধূপ-গন্ধবিকীরণে,
পূর্ণকুন্ডে পুণ্যবৃক্ষে মঙ্গল আচারে,
হরিদ্রা মঞ্জিষ্ঠারস ঝরে শতধারে।
তারপর ধীরে ধীরে সন্নত নয়নে
সে আসে ও আলিপনাভরা সে প্রাঙ্গণে?
পল্লবিনী সধগরিণী লাবণ্য-লতিকা
সালঙ্কারা, হস্তে লয়ে কুসুম-মালিকা,
অশোক পাটল পুষ্প ফুটাইয়া পায়,
কে রমণী নিশান্তের দীপসম চায়?
তার পর শুভদৃষ্টি-প্রাণ-বিনিময়,
সাত পাকে-লক্ষপাকে জড়িত হৃদয়।

BANGLADARSHAN.COM

তার পর সে পরশ মনোরসায়ন,—
নয়নে কৌমুদী সম সে যে সম্মোহন!
রোমাঞ্চে কদম্ব-ষষ্টি প্রস্ফুর কোরক,
পুলকেতে কণ্টকিত সকল অঙ্গক।
দুরূ দুরূ হিয়া বাজে মধুর পেলব
আবেশে নমিয়া আসে নয়ন-পল্লব।

* * * *

কিন্তু একি! কোথা গেল পরীক্ষার পাঠ?
কারাগৃহে বসে গেল সৌন্দর্যের হাট!
অধ্যাপক! ক্ষমা কর, কেন রক্ষ আঁখি?
নির্দেশ পালিতে তব করেছি কি বাকী?
এই চিন্তা, এ কল্পনা-একি মনছাড়া?
ছাড়িয়া গেছে কি মনোবিজ্ঞানের ধারা?

BANGLADARSHAN.COM

সৰ্বত্যাগী বিশ্বৰাজ

কেমনে চিনিব তোমা-তুমি নাকি বিশ্বের ভূপাল?
এক মুষ্টি অন্ন লাগি' পত্নীপাশে ভিখারী কাঙাল!
চিতা-ভস্ম অঙ্গরাগ, পরিধানে হেরি বাঘাম্বর,
জটাতে জড়ান সৰ্পফণা সে যে কিরীট সুন্দর!
তোমারে পাগল পেয়ে বৃষভে চড়া'য়ে অবশেষে
কে তোমারে সাজাইল এ অপূৰ্ব্ব রাজেন্দ্রের বেশে?
সৰ্ব্বজনে বিলাইয়া কণ্ঠভরা অমৃত তরল,
নীলকণ্ঠ, কি আনন্দে কণ্ঠে তুমি ধরিলে গরল?
বিলাইয়া পারিজাত, রক্ত পদ্ম, তুলসী মধুরা,
কেন তুমি বেছে নিলে বিল্বপত্র দুৰ্গন্ধ ধুতুরা?

তেয়গি' লাবণ্যলতা মনোরমা গিরিজা মোহিনী,
ব্রত-কৃশা তপোদন্ধা অপর্ণারে করিলে গৃহিণী!
হে ভবেশ, রাজ্যে তব কোন খানে মিলিল না ঠাই?
সকলে যা' দিল ফেলে, শিরে তুমি তুলে নিলে তাই!
তোমা হেরি' হে সন্ন্যাসী, সৰ্বত্যাগী ওগো বিশ্বৰাজ,
সঙ্কোচ কুণ্ঠার মরে' সৰ্ব্ব বিশ্ব পাইয়াছে লাজ।
সৰ্ব্ব ভোগ্য বস্তু ত্যজি' রাজা যদি শূশানে কান্তারে,
কেমনে সম্পদগৰ্বে রবে প্রজা সুখের সংসারে?
বিশ্বনাথ, আজো তুমি ফিরনিক তব সিংহাসনে,
সমগ্র জগৎ তাই ছুটে তব শূশান-সদনে!

কালোরূপ

ভোমরা, তোরে কুরূপ বলে? হলিই বা তুই কালো,
তোর রূপেতে সুন্দরেরই পূজার দেউল আলো।

সুন্দরেরই পূজার লাগি
ফুলের বনে আছিস জাগি;

বাহির দেখি' কে বোঝে তোয়? সুন্দর তুই প্রাণে।

রূপের ভোজে মধুর যাহা
পানটি করিস নিত্য তাহা,

ঢালিস পুনঃ রসধারায় গুঞ্জনে আর গানে।

হলিই বা তুই কালো, –

সুন্দর তুই, সুন্দরে তুই বাসিস যে রে ভালো।

ও কালো মেঘ, সুন্দর তুই, যদিও তুই কালো,
বুক ভরে' তুই ফুটাস যে রে সুন্দরেরই আলো।

ইন্দ্রধনুর স্বপন দেখিস,
ইন্দ্ররেণু গায়ে মাখিস,

সুরূপ শিখী নেচে উঠে প্রেমের পরশনে।

সুন্দরেরি বার্তা কহিস,
যক্ষপুরে পশরা বহিস,

অধরে তোর সুধার ধারা বর্ষণে আর স্বনে।

কে বলে তোয় কালো?

সুন্দর তুই, সুন্দরে তুই বাসিস যে রে ভালো।

ওরে গভীর কালো দীঘি, হলিই বা তুই কালো,
তোর বুকোতে উঠলো ফুটে সবার রূপের আলো।

রূপের মোহে মরাল ছুটে,
রূপ ছড়িয়ে কমল ফুটে,

চন্দ্র তারার সব সুষমা আঁকড়ে তোরে ধরে।

রূপসীরা স্নানের ছলে,

নোয়ায় মাথা তোর ও জলে,

রূপটি তাদের আপন রূপে দিস রে উজল করে।

কে বলে তায় কালো?
সুন্দর তুই, সুন্দরে তুই বাসতে পারিস ভালো।
ওরে আঁখি কালোবরণ, যদিও তুই কালো,
জগতে তুই ফুটিয়ে দিলি সবার রূপের আলো।
রূপেরে তুই দিলি জীবন,
রূপের বুকে তোর যে ভবন,
সব সুষমা লুটিয়ে পড়ে তোর ও পায়ের কাছে।
রূপ-সায়রে নিত্যস্নানে
মুদে থাকিস রূপের ধ্যানে,
রূপ সে তোর ও মর্শ্ব জানে তোর মাঝে কি আছে
যদিও তুই কালো,
সুন্দর তুই, সুন্দরে তুই বাসিস যে রে ভালো।

BANGLADARSHAN.COM

চিত্রতরুণী

(গান)

কে আছে তোমার মাঝে অসীম মোহন সাজে,
বলগো প্রিয়া!
কোন্ সে অপরিমিত নব রূপে তব নিতি
ফুটায় হিয়া?

তোমার স্বরূপে সখি শেষ যে নাহি,
অবাক হইয়া শুধু রহিগো চাহি';
অবিরত মধু ঝরে, অলি সে এলায়ে' পড়ে
নিয়ত পিয়া।

সেই হাসি, সেই মুখ, সেই প্রেম-ভরা বুক,
সেই সে ভাষা,

এক(ই) কথা অগণন, চলে শুধু অনুখন
সে ভালবাসা।

তবু মনে হয় যেন নূতন সবি,
মোহন তখনি তাই যখন লভি;
নানা ভাবে সারা বেলা কেবা করে ফুলখেলা
তোমার নিয়া?

BANGLADARSHAN.COM

প্রিয়া

(উত্তররামচরিত হইতে সংগৃহীত)

কুন্দকোরক-দন্ত-শোভন সুন্দর মুখখানি,
যেন বা মূর্ত মহাউৎসব কমনীয় তব পাণি
কণ্ঠ জড়ালে যেন বা চন্দ্রকান্ত মণির হার,
ইন্দুকিরণে শিশিরবিন্দু নিচিত অঙ্গে যার।
বাণী তব ম্লান জীব-কুসুমের বিকাশ-সাধিকা, প্রিয়া,
তৃপ্ত করিছে কর্ণকুহরে সুধাধারা বরষিয়া,
সব ইন্দ্রিয় পরিতর্পণ করি অর্পণ প্রাণ
অবসাদাহত চিত্তে নিত্য রসায়ন করে দান।
তোমার দৃষ্টি-মুগ্ধ-সরিতে নিত্য করাও ম্লান,
করি পদের কুটলনিভ প্রণামাঞ্জলি দান।
নেত্রযুগল অমৃতবর্তি, লক্ষ্মীস্বরূপা গেহে,
জীবন আমার, দ্বিতীয় হৃদয়, কৌমুদী-সুধা দেহে,
বর্ষোপলের মতন শীতল চারু অঞ্জলি তব
যেন বা ললিত অতি সুকুমার লবলীকন্দ নব।
সাত্ত্বিক প্রেমরসের পরশে সুন্দর সুশোভিতা,
মৃদু চঞ্চল স্বেদ-রোমাঞ্চ-কম্পনে পুলকিতা,
নববারিসেকে বিকচকোরক তনু তব মনোরম
প্রাবৃত সমীরে ঈষৎ চালিত নীপের যষ্টি সম।

BANGLADARSHAN.COM

স্পর্শ

(উত্তরচরিত হইতে অনূদিত)

কে দিল ঢালিয়া হরিচন্দন
পল্লবরস সঙ্গে,
নিঙাড়ি' ইন্দু- কিরণাক্রুর
মরি মরি মোর অঙ্গে!
কে দিল মানস- পরিতর্পণ
জীবনৌষধি বিত্ত?
সুধায় সিক্ত করিল তিক্ত
তাপ-জর্জর চিত্ত!
সঞ্জীবন এ পরিমোহন যে
পুরা পরিচিত স্পর্শ,
অঙ্গে অঙ্গে প্রেম তরঙ্গে
জাগায় নবীন হর্ষ!
সস্তাপজাত মূর্ছা ঘুচায়
আকুলানন্দ বন্যা
বিবশ করিছে প্রাণ, আনি' পুনঃ
জড়তা পুলকজন্যা।

BANGLADARSHAN.COM

আত্ম সমর্পণ

(হাফেজ হইতে সংগৃহীত)

বাঁধিতে অবোধ হিয়া কোথা হ'তে এল, প্রিয়া,
তোমার অলকে এত ফাঁস!
তোমার নয়নছায়ে স্বপনেরা গায়ে গায়ে
পরাণ হরিতে করে বাস।

তোমার কেশের তলে যুথিকা ফুটিয়া উঠে,
আদীন-প্রবালগুলি ও রাঙা অধরে লুটে,
সুরার উছল তেজ শোণিতে শোণিতে ছুটে
মদালস তব মৃদু হাস;
কে ছিটালে ফুলদল?— ঘেরি তব অঞ্চল
এত কেন আতরের বাস?

BANGLADARSHAN.COM

তোমার তোরণতলে মলিন ধূলির মাঝে
রবি শশী শির দুটি লুকাক্ লুটাক্ লাজে,
দিবস হ'উক ম্লান, জ্যোছনা সে স্ত্রিয়মান,

হোক আজি গোলাপ হতাশ।

মিছে আভরণ ফেলি' পিছে আভরণ ঠেলি',
কর তনু-তনিমা প্রকাশ।

তোমার গমনপথে পাতি দেই এই হিয়া,
তোমার চরণরাগ রুমালে মুছায়ে নিয়া,
তোমার কপোলকুপে পরাণ সঁপিয়া দিয়া
ডুবিয়া মরুক তব দাস;

যাহা কিছু মোর আছে তোমার পায়ের কাছে
সঁপিয়া বাঁচিবে ফেলি' শ্বাস।

আত্মদানের আকুলতা

(জালালুদ্দিন রুমী)

ওগো সুন্দর রথী,—ওগো সুন্দর শিকারী,
আঁখিবাণে বিঁধ হৃদয়-হরিণ মানস-কানন-বিহারী।

ওগো, নিশি নিশি তোমা লাগিয়া
চাঁদের মতন জাগিয়া,
তনুমন ক্ষীণ, হয় দিন দিন তব পথপানে নেহারি’
হরাইয়া দাও তোমার আলোকে হে রবি গগন-বিহারী।

প্রভু, তব পথপানে ছুটিয়া,
ভূতলে উপলে লুটিয়া,
এ নদী, কান্ত, হয়েছে শ্রান্ত তোমার চরণভিখারী,
উচ্ছল চল জোয়ারে টান গো উত্তালকলবিহারী।

ওগো সুন্দর রথী,—ওগো সুন্দর শিকারী,
তব প্রেমজালে বন্ধন কর চঞ্চল চিত্ত আমারি।

BANGLADARSHAN.COM

মরণে উৎসব

(ম্যাথু আর্নল্ড)

ঢালো ফুল কুঙ্কুম চন্দন

আর যাহা মধুর মঙ্গল—

শ্রান্তি-শেষে শান্তি লভি' সে যে

সুখী,—তার সাধনা সফল।

তার হাসি চেয়েছিল ধরা,

হাসিতে সে ভরে দেছে তায়,

হর্ষভরে হৃদি আজি নত—

তাই সে গো শান্তিটুকু চায়!

শোক তাপ ঝঞ্জনার মাঝে

ঘুরে ঘুরে অথির পরাণ,

শান্তি-শান্তি চেয়েছিল, তাই

শান্তি-ক্রোড়ে আজি সে শয়ান।

সঙ্কীর্ণ দেহের গেহকোণে

রুদ্ধশ্বাস সে আত্মা মহান;

মৃত্যুর বিরট সভাগৃহে

নিঃশ্বসিয়া জুড়াল পরাণ।

BANGLADARSHAN.COM

শেষের দিনে

(জালালুদ্দিন রুমী)

অস্তিম শয়নে হেরি' কর' নাক' হাহাকার

ওগো বন্ধুগণ!

সমাধি খনিতে দেখি' মিছামিছি মায়া-ভ্রমে

ক'রনা রোদন।

চন্দ্র সূর্য্য অস্ত যায়, তাই বলে' কে কোথায়

করে হাহাকার?

এ কলুষ রাজ্য হ'তে অস্ত গিয়ে পুণ্যরাজ্যে

উদয় তাহার।

আমার প্রিয়ের সহ মনোরম মিলনের

হ'বে নাট্যলীলা,

অনধিকারীর লাগি' বিরচিবে যবনিকা

সমাধির শিলা।

যখন প্রিয়ের গৃহে বিজয় মঙ্গলগান

হইবে আমার,

সে কেমন হ'বে বন্ধু, তখন তোমরা যদি

কর হাহাকার?

BANGLADARSHAN.COM

ধর্মক্ষেত্র

গোটা দেহ কার বিরাট দেউল, সুবিশাল বেদী,—ভূধর শির?
অর্ঘ্য কাহার ক্ষেত্র-কানন, পাদ্য শতেক নদীর নীর?
পূজার বাদ্য কীচক রক্তে, সিন্ধু-লহরে, বিহগ-গানে,
নিতি উৎসবে আরতি কাহার, আকাশ ভরিয়া আলোর বানে?
কুশের বলয়ে, ধূপের ভস্মে, শুষ্কপ্রসাদী পূজার ফুলে,
ভরা আলপনা চন্দন দাগে, গৃহ,—প্রান্তর নদীর কূলে?
কোথায় সদাই চরণ ফেলিতে শিহরে অঙ্গ ভক্তি-ভয়ে,
পবন কোথায় সত্ত্ববিমল, সলিল নিযুত কলুষ ক্ষয়ে?
সে যে গো আমার ধর্মক্ষেত্র, ভারত মাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি’।

গোধন কোথায় রেখেছে বাঁচায়ে তাপসের তপ, দেবের যাগ,
নৃপের ঋদ্ধি;—জননীকল্পা লভিয়াছে পূজা সেবার ভাগ?
হিংস্র কোথায় আমিষ ত্যজেছে লভিয়া পুণ্যকুশের গ্রাস?—
বেদীর মন্ত্রে দীক্ষিত তারা হয়েছে ঋষির দাসানুদাস,
কেশরী কেশর লুটায় লেহিতে জগৎ-মাতার চরণতল;
কালফণী মম পিতার অঙ্গ বেড়িয়া ফেলেছে আঁখির জল;
বিহগ কোথায় পরাণ দিয়াছে রুধির উগারি’ সতীর লাগি’,
খগরাজ কোথা লুটিয়া পড়িয়া বিভূর চরণে রয়েছে জাগি’?
সে যে গো আমার ধর্মক্ষেত্র, ভারতমাতার কর্মভূমি,—
ধন্য জনম, যাহার পুণ্য বুকের পীযুষ স্তন্য চুমি’।

দেবের ব্যজনে সাধের পুচ্ছ দিয়াছে কোথায় চমর-বধু,
তুচ্ছ জীবন করেছে উচ্চ মধুমক্ষিকা বিতরি’ মধু?
বহে মৃগনাভি নাভিতে হরিণ দিতে দেবতায় গন্ধসুখ,
দিয়াছে মুক্তা কুম্ভ বিদারি’ বারণ, শুক্তি,—বিদারি’ বুক?
পাষণ আপন বক্ষ চিরিয়া দেছে কুক্কুমসিঁদূররাগ,
তৃণ তরু দেছে আপন অস্থি সাধিতে কোথায় দেবের যাগ?
কীট কোথা দিয়া আপনার হিয়া পরায়েছে মায়ে চেলাঞ্চল,
আপন পরাণে রঞ্জিয়া দেছে জগৎ-মায়ের চরণতল?

সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্য বুকের পীযুষ স্তন্য চুমি’।

“কৃষ্ণ কৃষ্ণ, রাম-রাম” বিনা গাহে না কোথায় সারিকাশুক?
রামায়ণ স্রোত দিয়াছে খুলিয়া ক্রৌঞ্চ কোথায় বিদারি’ বুক?
তিত্তিরি কোথা বসি আশ্রমে উপনিষদের বারতা কয়,
কৃতকপুত্র ময়ূর করেছে ঋষি-তনয়ের হৃদয় জয়?
কানন পেলেছে যোগী সন্ন্যাসী অশোক-বিল্ব-বটের ছায়,
আনন মলিন হোমের ধূমেতে, করুণা অরুণ নয়নে চায়;
ধরেছে বাকল, অক্ষ-মালিকা, ভৃঙ্গার, কোথা বিটপীকূল,
ক্ষণে ক্ষণে ঐ তনু রোমাঞ্চে ফুটিয়া উঠেছে কেশর ফুল?
সে যে গো আমার ধর্মক্ষেত্র ভারতমাতার কর্মভূমি,

ধন্য জনম, যাহার পুণ্য বুকের পীযুষ স্তন্য চুমি’।

দারু, তৃণ, হিয়া পাষাণে ঘরষি’ কোথা দেছে দেবে গন্ধরস,
দেবতা-দেউলে দহিয়া মরণে লভিয়াছে ধূপ অমর যশ?
গোময় কোথায় করে দেছে শুচি, লক্ষ্মীমায়ের আঙিনাতল?
অর্ঘ্যের লাগি কোথা ফুটে ফুল, ভোগের লাগিয়া ধরে গো ফল?
আশীষ কোথায় দূর্বীর দল, মঙ্গলমাটি মৃগরোচনা?
ধান্য কোথায় কমলাদেবীর অঞ্চলঝরা মুক্তাকণা?
বৈশাখদিনে অশথ কোথায় লভে গাঙ্গেয় ঝারার জল?
দীপ-আলোকিত তুলসীকুঞ্জ মরণেতে দেয় সুমঙ্গল?
সে যে গো আমার ধর্মক্ষেত্র ভারতমাতার কর্মভূমি,

ধন্য জনম, যাহার পুণ্যবুকের পীযুষ স্তন্য চুমি’।

স্বরগের ঘাটে নিতি খেয়া দিতে জাহ্নবী মায়ে রেখেছে কে বা?
কোথায় ধর্ম-কর্ম-ফলদা সরযু যমুনা তমসা রেবা?
ঋষির আদেশে কোথায় শৈল নমিয়া পড়িল তাঁহার পায়?
ভূধর-নৃপতি ধরিল সাদরে সন্ততিরূপে জগৎ-মায়?
পুণ্য-পুলক-শিহরণ সম সাত্ত্বিক রসে ভক্তদেহে,
শতেক তীর্থ মঙ্গলপীঠ জাগিয়া উঠিল কাহার গেহে?
আমূল মর্ম মস্তন করি সিন্ধু কাহার পরাণ পণে,
কমলা, ইন্দু, সুধা, মন্দার, বিতরিয়া দিল দেবতা জনে?

সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

নরনারী কোথা প্রভাতে দেউলে আরতির শুভ শঙ্খতানে,
জেগে উঠে চায় ভক্তিপ্রণত রক্ত তরুণ অরুণ পানে?
স্নানপূত শুচি, সিক্ত বসনে ডেকে আনে গৃহী অনাথজনে,
অর্পণ করে তর্পণ বারি স্বর্গত যত পিতৃগণে;
পঞ্চ যজ্ঞ করিয়া সমাধা অতিথি ভিখারী তুষিয়া নিতি
দিবসের শেষে আমিষবিহীন পূত ভোজনের কোথায় রীতি?
সন্ধ্যায় শত সারিয়া কৃত্য সুপ্তি কোথায় ক্লাস্তিহরা?
স্বপনেও কোথা হেরে গৃহী নিতি ভৃঙ্গার জটা বাকল ধরা?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

নিশাতমঃ দূর আরতি-আলোকে, ভোজ্য কোথায় পূজার ভোগ,
দেউল-সোপান শয্যা কোথায়, চরণামৃত হরে গো রোগ?
বিভূনামলেখা তিলক ভূষণ, তীর্থে ধূলি অঙ্গরাগ,
গার্হপত্য মরণের চিতা, দেবতার ঋণ শোধিতে ষাগ?
পূজার কুসুমে দিন গণে নারী, হরি বলে' ফেলে দীর্ঘশ্বাস,
তনয়ের নাম রাখে কোথা গৃহী বিভুর চরণ, মায়ের দাস?
জননী কোথায় অন্নপূর্ণা দুখী তাপী জনে ধরেছে বুক,
জনক কোথায় শাশানে বেড়ায় কঙ্কালমালা পরিয়া সুখে?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

শিল্প কাহার দেউলরচনা মূর্তিগঠনে প্রকাশ পায়?
সঙ্গীত কোথা ভাবগদগদ মার পদ বুক ধরিতে চায়?
কার সাহিত্য সতীর সাধুর দেবতা জনের করেছে সেবা?
বড় কবি কার করুণা-পাথার প্রেমের পাগল সাধক যে বা?
অনল, অনিল, গ্রহতারা, রবি লভিয়াছে কোথা পূজার দান?
প্রজাপতি কোথা করে সোমরস সন্ধ্যা উষার স্তোত্রগান?
কার গৃহে গৃহা শিলার খণ্ড জাগ্রত দেব, বেদীর' পরে?
সব চরাচর লভে কার পূজা পরংব্রহ্মে বক্ষি ধরে?

সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

কর্মে কোথায় শুধু অধিকার, ফল সে ত যায় ধাতার পায়,'
মরণ মিথ্যা, অমর আত্মা নবীন বসন পরিতে চায়।
নিজ ভাবনায় রহিলে মগন কোথায় নিখিল ভূবন ভুলি',
অভিশাপ আশে উদ্যত জটা বিদ্যুৎ ছটা রোষেতে তুলি'?
নারী কোথাকার দেবীর মূর্তি মদন শমন চরণে পড়ে,
আজীবন কোথা ব্রহ্মচারিণী, অথবা পতির চিতায় মরে?
ইহলোক কোথা প্রবাসের মত, ভোগ হয় যেন মলিন ক্লেদ,
গৃহেতে অনল জ্বলিলে কোথায় গৃহী খুঁজে তার যজুর্বেদ?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

ধর্মাচরণে বিবাহ কোথায়, উজলিতে কূল কোথায় সূত?
বর্জন তরে অর্জন কোথা, অভিষেক কোথা হইতে পূত?
কর্মবলের লাগি যৌবন, অতিথির লাগি কোথায় গেহ?
পুনর্জন্ম জিনিতে জনম, আত্মার লাগি কোথায় দেহ?
ষোগের লাগিয়া স্বাস্থ্য কোথায়, তপের লাগিয়া কঠোর যোগ?
চিরনিবৃত্তি লভিবার তরে কোথায় অচির কালের ভোগ?
জীবন-ধারণ ভুবনের লাগি, পুণ্যের লাগি মনের ভাব?
নবীন শক্তি লভিয়া ফিরিতে কোথায় ইচ্ছা-মরণ-লাভ?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

কোথা তপঃকৃশ ঋষিতনয়ের ক্ষীণ অঙ্গুলি হেলন-ভরে
নৃপতির শির, উদ্ধত বাজি, উদ্যত অসি নমিয়া পড়ে?
রাণীসহ রাজা ধেনুর সেবায় কোথায় কাননে ভূধরে ফেরে?
নৃপসুত ঘুরে পথে প্রান্তরে কাঁদিয়া দুঃখী জগৎ হেরে'?
শরণাগতের লাগি নরপতি দিতে গেল কোথা আপন প্রাণ?
পাপের শাস্তি লাগি দেবর্ষি হেলায় করিল অস্থিদান!
যুবরাজ কোথা সখা বলি ডাকি' নিষাদে বানরে ধরিল বুক,
মরণের আগে মুক্ত নরেশ কমলার সুতা লভিল সুখে!

সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

কোথা ভিখারীর ক্ষুদের লাগিয়া বাঁধা ভগবান কুটীর-দ্বারে?
যমুনায় ফেলে পরশ-পাথর কোথায় তুচ্ছ জানিয়া তারে?
পতির নিন্দা করিয়া শ্রবণ সতী তাজে কোথা ঘৃণায় প্রাণ?
বৃদ্ধ পিতারে যৌবন দিল, অতিথিরে কোথা পুত্রদান?
সারা জীবনের সাধনার ফল কোথা দেয় ব্যাধ গুরুর পায়?
পঞ্চ বরষে রাজার তনয় বনে বনে কেঁদে হরিরে চায়!
ভ্রাতার লাগিয়া নিদ্রা ক্ষুধায় জিনিল যোদ্ধা লালসারণে,
প্রজার লাগিয়া জীবনকল্পা মহিষীরে কোথা পাঠায় বনে?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

দুঃখধবল স্নিগ্ধদিঠিতে কে করায় নিতি মোদের স্নান,
আকাশে বাতাসে মাতাইয়া ভাসে কোথা নিমায়ের প্রেমের গান?
স্তন্যের সহ কে দেয় কণ্ঠে পাপতাপজয়ী হরির নাম,
আশীষ কাহার বরের মতন—করে গো পূর্ণ মনস্কাম?
শত্রু জনেরে ক্ষমা কে শিখায়, লুটিতে মিত্র জনের পায়,
কীর্তননাচা পদধূলি লয়ে কে দেয় মাখায়ে সবার গায়?
অঞ্জলি দেয় কুসুমে ভরিয়া, শিরগুলি দেয় নোয়ায়ে আর!
বক্ষে কে দেয় বিমল শান্তি, চক্ষে জাগায় স্বর্গদ্বার?
সে যে গো আমার ধর্মক্ষেত্র ভারতমাতার কর্মভূমি,
ধন্য জনম, যাহার পুণ্যবুকের পীযুষ স্তন্য চুমি'।

শেষ

দিবস হইল শেষ। রবি গেল পাটে;
কঠোর কর্মের পথে যাত্রা শেষ তার।
মাঠে শেষ কৃষিকার্য, বেচা কেনা হাটে,
তটে শেষ পাটনীর শেষ খেয়াপার।
ঘাটে শেষ ঘটভরা কাঁকণের তান,
গোঠে শেষ গোধনের দিনান্ত ভোজন;
বট বিল্ব বিটপীতে বিহগের গান,
বাটে শেষ মানবের ব্যস্ত বিচরণ।
ফোটা শেষ কুসুমের বনে উপবনে,
মঠে শেষ আরতির মঙ্গল নিনাদ,
ঝাঁটে পাটে গৃহকাজ কুটীর প্রাঙ্গণে,
হাঁটা শেষ পথিকের ক্লান্তি অবসাদ।
এই সর্ব শেষমাবে উদাস সন্ধ্যায়,
জীবনের শেষ, সেও উঁকি মেরে যায়।

BANGLADARSHAN.COM

পারিশিষ্ট

দীপ্ত বৃন্দাবন

শ্রীমতী নিরুপমা দেবী লিখিত

ইন্দু বিনা বৃন্দাবন অন্ধকার, সন্দ' কার?

নিত্য যেথা পূর্ণরূপ নন্দপুরচন্দ্রমার!

নিত্য যাঁর সন্ধ্যারতি বিশ্ব করে জ্বালায়ে বাতি,

পুষ্পবনে মলয় ছুটে ব্যজনি ধূপ-গন্ধভার!

'কিতম বঁধু মধুপ' দলে গুঞ্জি' ফুলে পরশে ছলে,

পাপিয়া-পিক-কণ্ঠ সদা বৈতালিক বন্দনার,

বৃন্দাবনসঙ্গ ত্যজি' চলে না পদদ্বন্দ্ব তাঁর!

সগু রঙে মেঘের ঘটা হেরিয়া যায় চূড়ার ছটা

হরষে শিখা শিখিনী সহ প্রসারয়ে শিখণ্ড-ভার!

ঝুলনে ঝুলে' কদমতলে গোষ্ঠে খেলে গোপালদল,

শঙ্কাহীন গোধনগণ 'হিতকারী গোবিন্দ' যার!

বৃন্দাবন-সঙ্গ ত্যজি' চলে না পদদ্বন্দ্ব তাঁর!

'নীলাধলে ঢাকিয়া আধা ধরনীরাণী মানিনী রাধা,

কৃষ্ণচূড়া পরশ চাহে চরণঅরবিন্দ যার।

ব্যঙ্গে হাসে সারিকা শুক গাহিছে কেহ বিরস মুখ,

'পরিহর গো মন্যু রাধে' মিনতি শত সান্ত্বনার!

বৃন্দাবন-সঙ্গ ত্যজি' চলে না পদদ্বন্দ্ব তাঁর!

হৃদয়-দধি মন্ত করি ভুবন রাখে ভাণ্ড ভরি',

গন্ধ পেয়ে করে সে চুরি, স্বভাব হেন মন্দ তার।

ব্রজের সেই নবনী চোরে মানসচুরি করিয়া কেরে

আশ্রিতের সর্ব্ব হরি' রাখেনা কিছু মন্ত্রণার!

বৃন্দাবন-সঙ্গ ত্যজি চলেনা পাদদ্বন্দ্ব যাঁর।

অজানা জলে করিয়া হেলা যাত্রীদলে ভাসায় ভেলা,

বিষম-ভার পসরাভারে ক্লান্ত নহে স্কন্ধ আর।

পাটনী তীরে আনিয়া তরী যাত্রী তোলে পসরা ধরি,

পারের কড়ি লাগেনা যারে, কে রাখে খেয়া বন্ধতার
বৃন্দবন-সঙ্গ ত্যজি' চলে না পদদ্বন্দ্ব য়ার।

নখিল করি বধূর সাজ যমুনা-তীরে দাঁড়ায়ে আজ,
পবনে কেগো বাজায় বাঁশী, পরশি কোন্ রক্ত তার?
আরাধিকা এ রাধার তরে 'রাধিকানুগ' সদাই ফেরে,
হৃদয়-নদী উছলি' চলে উজানে বহি' মন্দধার।
অনুভব-আনন্দে সদা নিত্য সে যে রয়েছে বাঁধা
ভাবের হেন নন্দপুরে পাশে কি নিরানন্দ আর?
বৃন্দাবন উজলি' আছে কিরণে চিরচন্দ্রমার!

BANGLADARSHAN.COM

শ্রীযুক্ত কালিদাস রায়ের দুইখানি অপূর্ব কাব্যগ্রন্থ

কুন্দ ও কিসলয়

এই কাব্যদ্বয় পাঠান্তে মুঞ্চ কবি দেবেন্দ্রনাথ সেন এই কবিতাটি লিখিয়াছেন:-

অপূর্ব নৈবেদ্য

কি আনন্দ! এ যেন রে অকস্মাৎ আইল ফাল্গুন,

অকস্মাৎ বহিল মলয়!

কি আনন্দ! কে যেন রে দাউ দাউ জ্বালিল আগুন

ঘুচাইয়া শীতাত্তের ভয়।

নগরের কোলাহলে বুঝি মোর বাহিরায় আয়ু

হয়েছিলু এত ঝালাপালা!

তোমার সবুজ কুঞ্জে, গ্রামে আসি, সেবি মুক্ত বায়ু

হে সুকবি, জুড়াইল জ্বালা!

বাত্যাঙ্কিষ্ট পোতযানে আরোহিয়া সমুদ্র যাত্রীর

এ যেন রে কূলে আগমন!

বহু বর্ষ কারাগারে রুদ্ধ থাকি মুক্ত কয়েদীর

এ যেন রে গৃহ-দরশন!

বন্ধ্যার অখ্যাতি লভি' এ যেন রে প্রৌড়া রমণীর

চাঁদপারা সন্তান প্রসব!

এ যেন যুগান্তে আহা বৃন্দাবনে, মুরলী-ধারীর

পদার্পণ! সেই বংশীরব!

তোমার সৌন্দর্যকুঞ্জে যতবার পশি আমি, কবি!

হেরি তথা শোভ্য নব নব!

গলাগলি করি তথা হাসে চাঁদ আর বালরবি

অফুরন্ত ফুলের বৈভব!

দোয়েলের কোকিলের কলরব অফুরন্ত মরি

অফুরন্ত ময়ূর নাচন!

যাদুকর, এগো কোন্ মায়াপুরী? দিবা বিভাবরী
অফুরন্ত আনন্দ স্বপন!

তোমার কবিতারাণী মরি মরি অনিন্দ্য সুন্দরী
মূর্তিমতী উষারাণী সমা!

প্রভাত পবন স্পর্শে অলঙ্ক কাঁপিছে থরথরি
লাল চেলী এ কি নিরুপমা!

পদগন্ধ ভূর্ ভূর্ মুখে ছোটে! সীমন্তে সিন্দুর
প্রাণচোরা গালভরা হাসি!

শিশির-মুকুতা-হার কণ্ঠে দোলে, মধুর, মধুর
এ কি শোভা! লাবণ্যের রাশি!

তোমার কবিতারাণী মরি মরি অনিন্দ্য-সুন্দরী
মূর্তিমতী শারদী শর্করী!

রূপবন্যা জ্যোৎস্নাসম উছলিছে বিশ্ব আলো করি;

তরঙ্গিছে ভাবের লহরী!

ভূর্ ভূর্ মুখে ছোটে, আহা মরি চিত্ত বিমোহন
শেফালীর দুরন্ত সৌরভ!

অরসিক কি বুঝিবে বোঝে শুধু রসিক সূজন
পৌর্ণমাসী নিশির গৌরব।

BANGLADARSHAN.COM

কবির পরিণত যৌবনের রচনা পাঠে সুকবি দেব কুমার রায় চৌধুরী লিখিয়াছেন:—*

অনুভূতি করে স্তুতি তব করে মূর্তি লভিবারে,
প্রকৃতি বিস্মৃতি বশে খুলে দেয় অন্তর ভাঙার
মলিন এ মহী বন্দে গীতছন্দে শোভার সম্ভারে
চরাচরে চারিদিকে সম্বর্ধন উদ্গীত তোমার।
কি অপূর্ব অমিয়ার উৎস মুখ দিলে আজি খুলি
এ বিশ্ব মন্থন করা সৌন্দর্যের উদ্বেল প্লাবন,
হৃদয়ের রক্ত রাগে কি চিত্র অঙ্কিছে তব তুলি
অকুণ্ঠ উল্লাসে আমি নিত্য তাহে বিস্ময় মগন।
হে সুন্দর শক্তিমান, হে অজ্ঞাত আপন আমার
তব গীতে মম চিতে জাগে নিতি অতীতের স্মৃতি,
মম মন মরু মাঝে আসে দিব্য হর্ষের জোয়ার
শুষ্কপ্রাণে মঞ্জুরিয়া উঠে পুনঃ অপরূপ প্রীতি।
হে নব বরণ্য করি, অই তব ত্রি তন্ত্রী ঝঙ্কারে
মম হিয়া পুলকিয়া উঠে মাতি আনন্দ আবেশে
ভাবি আমি এতদিনে মিলিলরে আজি এ সংসারে
যে মোর আপনজন ধন্য হবো যারে ভাল বেসে
অখ্যাত অজ্ঞাত আমি, উপেক্ষিত, চিরব্যর্থ কাম
আশীর্ব্বাদ করি বন্ধু সার্থক হউক তব নাম।

* ভাদ্র ১৩২০; 'বিজয়া' পত্রিকায় প্রকাশিত।

॥সমাপ্ত॥